

## **Enyaarubha ya Pauro ku Bharooma Obhutaangiro**

Enyaarubha yino yakaamirwe na Pauro. Eriibhaga ryo okukaama enyaarubha yino, Pauro yaari akyaari kutaarira omugye gwa Rooma. Abhakrisito bha Rooma bhayo, bhaari Abhayahudi hamwe na abhaatu bhano bhatari Abhayahudi. Pauro yakaamiri enyaarubha yino, okubha yeegye Abhakrisito bha Rooma kyeego ekweenderwa okumwiikirirya Krisito no okumenya amang'ana amakong'u gano gakutura kumubhona kuriing'aana no obhwiikirirya bhuyo.

Munyaarubha yino ya Abharooma, Pauro aheegya amang'ana go obhutuurya, bhuno tukunagya kubhona kuhitira ku Yeesu Krisito omweene ego. Akabhabhuurira Abhakrisito Abhayahudi kubha amang'ana go obhutuurya bhuno bhuri Mwiiragano rye Ekare. Ku Bhakrisito bhano bhatari Abhayahudi, akabheerekya obhuzaabhi bhwa Taatabhugya okubhukora kubhaatu bhaaye. Mukitabhu kino Pauro akeegya kubha Taatabhugya amariri kutweerya na aratubhara bhaheene embere waaye, kweego etwe tutakweenderwa kusakya okumuzomera kwo okutuna emigiro gyaaye kwe eziinguru zyeetu. Taatabhugya atuheeri Ekoru Muhoreeru kukaangata obhwiikari bhweetu, okubha twiikare kyeego Taatabhugya

akutweendera.

### *Obhukeerya*

<sup>1</sup> Enyaarubha yino nikaamiri enye Pauro, omugya wa Krisito Yeesu. Enye niabhirikiirwe nibhe omweega waaye, nikasorwa nibhe nirarwaaza Amang'ana Amazomu okurwa ku Taatabhugya.\*

<sup>2</sup> Amang'ana Amazomu gayo, nigo Taatabhugya yarageenie kweema ekare, kuhitira kubharooti bhaaye mu Makaamo Amahoreeru.

<sup>3</sup> Amang'ana Amazomu gayo, nigo gari iguru yo Omwaana waaye.† Omwaana wuyo, akiibhurwa kwe esimuka yo omuutu mukisyooko kyo omutemi Daudi.‡

<sup>4</sup> Nawe kwe Ekoru Muhoreeru,§ Taatabhugya akamusora Omwaana waaye wo obhunagya bhwoosi, kwo okumuryoora kurwa mubhaku, na Yeesu Krisito omweene niwe Omukuru weetu.

<sup>5</sup> Kwo okuhitira ku Yeesu Krisito, Taatabhugya akaaniha orubhaango rwo okubha omweega waaye, okubha nirabhabhirikira bhano bhatari Abhayahudi mubhyaaro bhyoosi, bhanagye okumwiikirirya no okumwiigwa Omukuru Yeesu, ne eriina ryaaye rikumibhwe.

<sup>6</sup> Emwe muri gati waabhu na mubhirikiirwe kubha abhaatu bha Yeesu Krisito.

\* **1:1** Rora Amahokya ga Abheega 9:15; Abhagaratia 1:1, 15.

† **1:3 Omwaana waaye.** Rora *Omwaana wa Taatabhugya* mu Bhugaruri bhwa Amang'ana Amakong'u. ‡ **1:3 Daudi.** Rora eng'ana yino mu Bhugaruri bhwa Amang'ana Amakong'u. § **1:4 Ekoru Muhoreeru.** Rora amang'ana gano mu Bhugaruri bhwa Amang'ana Amakong'u.

<sup>7</sup> Nirabhakaamira emwe abhiikirirya bhoosi bhano muri Rooma eyo. Taatabhugya abhaseegiri bhukong’u, na abhasoriri okubha mubhe abhaatu bhaaye abhahoreeru.\*

Orubhaango no omureembe okurwa ku Taatabhugya Taata weetu, na ku Mukuru Yeesu Krisito, bhibhe neemwe.

*Pauro ariigoomba okutaarira abhiikirirya bha Rooma*

<sup>8</sup> Nitaange kwo okubhuga, “Ozomirye Taatabhugya,” kuhitira ku Yeesu Krisito, kwiiguru weenyu bhoosi, kwo okubha amang’ana iguru yo obhwiikirirya bhweenyu gamenyekeeni mukyaaro kyoosi.

<sup>9</sup> Taatabhugya aramenya kyeego nikubhahiita. Obhutiku no omwiisi nirabhasabhira ku Taatabhugya, wuno nikumuhokeerya kwe ekoro yaane yoosi kwo okubharaarikirira abhaatu Amang’ana Amazomu go Omwaana waaye.

<sup>10</sup> Kwii bhaga ryoosi niramusabha kubha, Taatabhugya araaseege akuuniha omweeya gwo okuza kweemwe bhoono.

<sup>11</sup> Nine enaamba bhukong’u kurorana neemwe, okubha nigumirye obhwiikirirya bhweenyu kwo okubhaha orubhaango rwa Taatabhugya.

<sup>12</sup> Kino nikweenda ni kubha, obhwiikirirya bhweenyu bhunitoongere ekoro enye, no obhwiikirirya bhwaane bhubhatoongere emwe.

<sup>13</sup> Abhahiiri bhaane, ndeenda mumenye kubha, maanga maaru niari niriiseega kuuza

---

\* **1:7 Abhahoreeru.** Rora eng’ana yino mu Bhugaruri bhwa Amang’ana Amakong’u.

kweemwe, nawe tee bhoono niribhiirwe.  
Ndeenda niize kweemwe, okubha nibharwaazire  
abhaatu gati weenyu bhamutuniirire Omukuru  
Yeesu, kyeego niakoriri kubhaatu abhaandi  
bhano bhatairi Abhayahudi.

<sup>14</sup> Taatabhugya aniswaagirye nibhe  
nirarwaaza Amang'ana Amazomu kubhaatu  
bhoosi, ku Bhayunaani na kubhano bhatairi  
Abhayunaani,† bho obhumenyi na bhano  
bhatana obhumenyi.

<sup>15</sup> Kweego, niriigoomba bhukong'u okuuzza  
kweemwe Rooma eyo kubharwaazira  
Amang'ana Amazomu.

### *Obhunagya bhwa Amang'ana Amazomu ga Taatabhugya*

<sup>16</sup> Enye nitakurora soni kuraarika Amang'ana  
Amazomu gayo, kwo okubha ni bhunagya bhwa  
Taatabhugya bhwo okutuurya abhaatu bhoosi  
bhano bhakumwiikirirya Yeesu, kweemera  
Abhayahudi tee abhaatu bhano bhatairi  
Abhayahudi.

<sup>17</sup> Amang'ana Amazomu gayo, gareerekya  
kubhweero kyeego Taatabhugya akubhabharira  
abhaatu kubha bhe eheene embere waaye.  
Abhaatu bharabharirwa kubha bhe eheene  
embere wa Taatabhugya kwe enzira yo  
obhwiikirirya. Ni kyeego Amakaamo

---

† **1:14** Eriibhaga rino enyaarubha yino yakaamirwe, ekigaambo kya *Abhayunaani* ne eziinyaangi zyaabhu bhikamenyekana mubhyaaro bhyaaru. Abhaatu bhano bhakamenya okugaamba ekigaambo kye Ekiyunaani bhaari bharazeera abhaatu bhoosi bhano bhatamenyiri okugaamba ekigaambo kiyo no okukora amang'ana gano gakuriing'aana ne enyaangi yiyo.

Amahoreeru gakubhuga, “Omuutu we eheene, ariikara kwe ekigirirye kyo obhwiikirirya bhwaaye.”‡

*Taatabhugya aratema abhaatu kwe ekigirirye kye ebhibhi bhyaabhu*

18 Taatabhugya omweene areerekya kubhweero okurwa mwiisaaro kubha, arabhatema abhaatu bhano bhakumwaanga no okukora ebhibhi. Abhaatu bhayo bharabhisa obhuheene bhwaaye ne ebhibhi bhyaabhu.

19 Nawe etari kubha bhatamenyiri amang’ana ga Taatabhugya. Taatabhugya omweene akabheerekya kubhweero amang’ana gaaye, okubha gamenyekeni kubhaatu.

20 Obhweemero bhwe ekyaaro, Taatabhugya akateema ebhigiro bhyoosi. Kweema erii bhaga riyo, abhaatu bharanagya okumenya kyeego Taatabhugya ari, yisingabha bhatakumurora. Ebhigiro bhino yateemiri bhireerekya kubha Taatabhugya ana amanaga goosi ne esimuka yaaye, kweeki ewe ni Taatabhugya omweene, atariho owuundi. Kweego, abhaatu bhatakunagya kugaamba kubha bhatamumenyiri Taatabhugya.

21 Yisingabha bhamumenyiri Taatabhugya kyeego ari, nawe bhatakumuguungya naabhe okumubhuurira kubha azomirye kyeego ekweenderwa. Amiiseego gaabhu gatana bhweera, no obhwoongo bhwaabhu bhuri mukiirima.

---

‡ 1:17 Rora Habakuki 2:4.

22 Bhariizuungya kubha nibho bha amang'eeni, nawe ni bhageege.

23 Bhatigiri kumuguungya Taatabhugya wa kirakeego, bhakaseengera emisaambwa gyo okubhaazwa gino gituubheeni na abhaatu bhano bhakukwa, ebhityeenyi, ebhinyonyi ne ebhityeenyi bhino bhikugeendera eziinda.

24 Kwe ekigirirye kya gayo, Taatabhugya akabhatiga bhabhe bharatuniirira eziinaamba zyaabhu eziimbiihu, bhakukorerana amang'ana ge eziisoni kumibhiri gyaabhu.

25 Bhakatiga obhuheene bhwa Taatabhugya, bhakatuniirira orurimi. Bhakaseengera ebhibhuumbwa no okubhihokeerya, nawe bhakatiga okukora gayo ku Taatabhugya Omubhuumbi wuno akweenderwa okukumibhwa kirakeego. Gabhe ego.

26 Kwe ekigirirye kiyo, Taatabhugya akabhatiga bhabhe bharakora amang'ana ge eziisoni kyeego bhaari bhakweenda. Abhakari bhakatiga okuhokeerya emibhiri gyaabhu kyeego gyabhuumbirwe, na bhakahokeerya kyeego gitiiseegeerwe. §

27 Egoego abhasubhe nabho, bhakatiga okuhokeerya emibhiri gyaabhu, kyeego emibhiri gyo omusubhe no omukari gyabhuumbirwe. Abhasubhe bhariigoongeerya ebho kwe ebho, bharakora amang'ana ge eziisoni. Kwo okukora

---

§ 1:26 ***Abhakari bhakatiga okuhokeerya emibhiri gyaabhu kyeego gyabhuumbirwe, na bhakahokeerya kyeego gitiiseegeerwe.*** Obhugazuro bhwaku ni bhakari bhakatiga okuhiindira na abhasubhe bhaabhu, na bharahiindira na abhakari abharikyaabhu.

ego, bhiisoreeri abheene obhutemwa bhuno bhukuriing'aana na amahokya gaabhu amabhi.

<sup>28</sup> Ambe, abhaatu bhaangiri okumumenya Taatabhugya, kweego Taatabhugya neewe akabhatiga bhabhe bharatuniirira amiiseego gaabhu go okwiitubhuuzikania. Bhoono abhaatu bhakakora amang'ana gano gatakweenderwa kukorwa.

<sup>29</sup> Bhiizwiiri obhubhi tuubho nzaru, bharakora ebhibhi bhyaaru, kweeki bhane eziinaamba zye ebhigiro bhyoosi na bhano omugono. Bhareenda obhutiindi, obhwiiti, eniku, bharagaamba orurimi na bhana amiiseego amabhi. Ni bhamoonyi bha abhaatu,

<sup>30</sup> bha amatuki na bharamubhihirirya Taatabhugya. Bhatakumura amang'ana ga abharikyaabhu, kweeki ni bhaatu bho obhwiizuungya no okwiiguungya. Eriibhaga ryoosi bharakomya eziinzira eziihya zyo okukora amabhi. Bhatakwiigwa abhiibhuri bhaabhu,

<sup>31</sup> ni bhageege, bhatakukuunaania obhurage bhwaabhu, bhatana obhuseegi naabhe ebhigoongi.

<sup>32</sup> Abhaatu bhamenyiri bhuzomu kubha, omuutu akukora amahokya amabhi kya gayo, areenderwa asikibhwe na Taatabhugya. Naabhe ego, bhatakumura! Bharageenderera okukora amabhi, kweeki bharakomya abhaatu bhano bhakukora amahokya amabhi kya gayo.

## 2

*Taatabhugya arabhatinira ekiina abhaatu bhoosi okutama kwaahura*

<sup>1</sup> Ambe, awe Omuyahudi omurikyaane, wuno okutinira ekiina abhaandi, omenye kubha, otakunagya kwiisasaama ku Taatabhugya wuungabha weewi. Rora, hano okutinira ekiina abhaandi, oriitinira ekiina omweene, kwo okubha amang'ana amabhi gaabhu nigo gano okukora omweene.

<sup>2</sup> Etwe tumenyiri kubha Taatabhugya aratinira ekiina kwe eheene abhaatu bhano bhakukora amang'ana kya gayo.

<sup>3</sup> Nawe omurikyaane, oratinira ekiina abhaatu abhaandi eno awe omweene orakora amang'ana gayogayo! Oriiseega kubha oranagya kuryaara obhutini bhwe ekiina kya Taatabhugya?

<sup>4</sup> Taatabhugya ni muzomu bhukong'u, arakurorera ebhigoongi bhyaaru, na arakugumirira bhukong'u. Nawe awe, bhoono oreenda okuzeera gayo goosi? Otamenyiri kubha arakweerekya obhuzomu bhwaaye, okubha ote ebhibhi bhyaazo?

<sup>5</sup> Awe one ekisiraani, kweeki oraanga okuta ebhibhi bhyaazo. Kweego ambe, oriituurira obhutemwa kurusiku runo Taatabhugya arakore obhutini bhwe ekiina kyaaye kye eheene.

<sup>6</sup> Orusiku ruyo, Taatabhugya arabhariha abhaatu bhoosi kuriing'aana na amahokya gaabhu.\*

<sup>7</sup> Arabhaha obhuhoru bhwa kirakeego abhaatu bhano bhakugeenderera okukora amazomu, kino bhakwiisiga Taatabhugya abhahe

---

\* 2:6 Rora Zaburi 62:12.

omukumo, obhusuuku no obhuhoru bhuno bhutakusarika.

<sup>8</sup> Nawe aratiinda no okutema bho obhwiimani bhano bhakwaanga obhuheene no okukora amabhi.

<sup>9</sup> Abhaatu bhoosi bhano bhakukora amang'ana amabhi, Taatabhugya arabhaha enyaako haari ne enzagara,<sup>†</sup> kweemera Abhayahudi tee abhaatu bhano bhatari Abhayahudi.

<sup>10</sup> Nawe Taatabhugya arabhaha omukumo, obhusuuku no omureembe, abhaatu bhoosi bhano bhakukora amang'ana amazomu, kweemera Abhayahudi tee abhaatu bhano bhatari Abhayahudi.

<sup>11</sup> Taatabhugya atana bhwaahuri.

<sup>12</sup> Abhaatu bhano bhatari Abhayahudi bhatamenyiri emigiro gya Musa,<sup>‡</sup> bharakora ebhibhi na bhabhurirye emigiro egiindi. Abhayahudi bhane emigiro, nawe bharakora ebhibhi, na bharatinirwa ekiina kuriing'aana ne emigiro giyo.

<sup>13</sup> Bharatinirwa ekiina, kwo okubha Taatabhugya atakubharira omuutu we eheene wuno okwiitegeerera emigiro giyo, nawe wuno akukora kyeego emigiro gikumweerekeererya akore.

<sup>14</sup> Abhaatu bhano bhatari Abhayahudi, bhayo bhatamenyiri emigiro giyo. Naabhe ego, bhakukora amazomu kuriing'aana na amiiseego gaabhu, na amang'ana gayo ni kyeego emigiro

---

<sup>†</sup> **2:9** Rora 2 Abhatesaronike 1:6.    <sup>‡</sup> **2:12** *Emigiro gya Musa* ni emigiro gino Taatabhugya akabhaha Abhiiziraeri okuhitira ku Musa. Rora *Musa* mu Bhugaruri bhwa Amang'ana Amakong'u.

gya Musa gikweerekeererya, hayo ereerekyaa kubha bhamenyiri kukora gano gakweenderwa.

<sup>15</sup> Bhareerekyaa kwa amahokya gaabhu kubha kino kikugaambwa mumigiro, kikaamirwe muziikoro zyaabhu. Naabhe emitima gyaabhu, eriibhaga eriindi girabhatinira ekiina, ne eriibhaga eriindi girabheerekeererya kubha bharakora gano gakweenderwa.

<sup>16</sup> Niigo eraabhe orusiku rwo okutina ekiina. Taatabhugya arabhatinira ekiina abhaatu okuhitira ku Krisito Yeesu, naabhe kwa amiiseego gaabhu ge embiso. Amang'ana Amazomu gano nikurwaaza, niigo gari.

### *Abhayahudi ne emigiro gyo okusaarwa*

<sup>17</sup> Eraabhe awe oriibhirikira Omuyahudi heene, oriisiga kubha we eheene embere wa Taatabhugya kwo okugwaata emigiro gya Musa. Na kweeki oriikumya kubha awe ni muutu wa Taatabhugya.

<sup>18</sup> Oriirora kubha omenyiri obhuseegi bhwa Taatabhugya no okugiikirirya gano gano obhweera, kwo okubha wegiihwe emigiro.

<sup>19</sup> Oriirora kubha oreenderwa okukaangata abhaatu bhano bhatari Abhayahudi, kyeego omuutu wuno akukaangata abhahoku, kasi kyeego etara yino ekumirika abhaatu bhano bhari mukiirima. §

<sup>20</sup> Kwo okubha emigiro girakubhuurira amang'ana ga amang'eeni goosi no obhumenyi bhwe eheene, oriirora kubha awe ni mweegya

---

§ 2:19 Rora Isaya 42:6, 49:6, 60:3.

wa abhageege na abhaatu bhano bhakyaari  
kukong'ana mumang'ana ga Taatabhugya.

<sup>21</sup> Awe oreegya abhaatu abhaandi, nawe kwaki otakukora gano okweegya? Oreegya abhaandi kubha bhatiibha, nawe kwaki awe omweene oriibha?

<sup>22</sup> Awe oreegya abhaatu kubha bhataseebheeta, nawe kwaki awe omweene oraseebheeta? Awe orabhihirirya emisaambwa gyo okubhaazwa, nawe kwaki awe omweene oriibha ebhigiro okurwa muziinyumba zyo okuseengera emisaambwa giyo?

<sup>23</sup> Awe oriikumya kubha omenyiri emigiro gya Taatabhugya, nawe oramuzeera Taatabhugya kwo okusarya emigiro gyaaye.

<sup>24</sup> Kweego, ni kya Amakaamo Amahoreeru gakubhuga, “Eriina rya Taatabhugya riratukwa na abhaatu bhano bhatari Abhayahudi, kwe ekigirirye kya amahokya amabhi gano emwe Abhayahudi mukukora.”\*

<sup>25</sup> Okusaarwa<sup>†</sup> kwaazo kuno obhweera, eraabhe orakora kyeego emigiro gikugaamba. Nawe eraabhe orasarya emigiro, okusaarwa kwaazo kutana obhweera bhwoobhwoosi, kweeki awe orabha kyo omuutu wuno atasaarirwe.

<sup>26</sup> Kweego, omuutu wuno atasaarirwe, eraabhe arakora kyeego emigiro gikugaamba, Taatabhugya aramwiikirirya kyo omuutu wuno asaarirwe.

<sup>27</sup> Abhaatu bhano bhatari Abhayahudi bhatasaarirwe, nawe eraabhe bharakora kyeego

---

\* **2:24** Rora Isaya 52:5; Ezekieri 36:20, 22. † **2:25 Okusaarwa.** Rora eng'ana yino mu Bhugaruri bhwa Amang'ana Amakong'u.

emigiro gikugaamba, amahokya gaabhu gareerekya kubha emwe Abhayahudi ni bhatemya bhe ebhibhi. Erabha ego, kwe ekigirirye emwe Abhayahudi musaarirwe, kweeki Mumenyiri emigiro gya Taatabhugya, nawe murasarya emigiro giyo.

<sup>28</sup> Ambe, mumenye kubha, etari bhoosi bhano bhiibhwiirwe no Omuyahudi bharabha abhaatu bha Taatabhugya. Omuutu atakunagya kubha omuutu wa Taatabhugya kutuukana no okusaarwa kumibhiri ego.

<sup>29</sup> Omuutu wa Taatabhugya ni wurya akumwiiigwa Taatabhugya kwe ekoro yaaye. Okusaarwa kwe eheene kurakorwa ne Egoro Muhoreeru mukoro, etari kwo okugwaata emigiro gya Musa. Omuutu kya wuyo, atakubhona omukumo okurwa kubhaatu, nawe arakumibhwa na Taatabhugya omweene.

### 3

#### *Taatabhugya ni mwiikirirya ku Bhayahudi*

<sup>1</sup> Bhoono bhuriho bhweeraki okubha Omuyahudi? No okusaarwa kuna bhweeraki?

<sup>2</sup> Ni heene, okubha Omuyahudi kuno obhweera bhwaaru. Eriing'ana ryo okutaanga ni kubha, Taatabhugya akabhaha Abhayahudi amang'ana gaaye.

<sup>3</sup> Nawe Abhayahudi abhaandi bhataari bhaheene kwo okugwaata amang'ana gaaye. Ambe, tubhuge Abhayahudi bhayo bhamukoriri Taatabhugya neewe atige obhuheene kwo okukora amang'ana gano yabhugiri?

<sup>4</sup> Zeyi, naabhe hasuuhu! Abhaatu bhoosi ni bhabheehi, nawe Taatabhugya yeerekirye kubha arakora kino akubhuga. Ni kyeego Amakaamo Amahoreeru gakubhuga iguru waaye, “Oraahaye abhaatu kwe ebhibhi bhyaabhu, amang’ana gaazo ni ge eheene. Oraabhatinire ekiina, obhutini bhwe ekiina kyaazo ni bhwe eheene.”\*

<sup>5</sup> Nawe, abhaandi bharanagya okugaamba, “Ebhibhi bhyeetu etwe Abhayahudi bhirakora ebhigiro ebhizomu, bhiragirya abhaatu bharore kyeego Taatabhugya ni we eheene kwo okutina ekiina kyaaye. Kweego, etari bhuzomu araatuteme, eheene?”

<sup>6</sup> Zeyi, naabhe hasuuhu! Yiingabheeri ego, erabhabhwi Taatabhugya abhe we eheene okutinira ekiina abhaatu bhe ekyaaro?

<sup>7</sup> Kweeki bharanagya okugaamba, “Etwe turaakore ebhibhi, abhaatu abhaandi bhararora kubhweero kubha Taatabhugya ni muheene. Bhoono, eraabhe ebhibhi bhyeetu bhiragirya Taatabhugya aguungibhwe, kwaki tukyaari turatinirwa ekiina kya abhaatu bhe ebhibhi?”

<sup>8</sup> Yiyo ni kisi no okugaamba, “Tubhe turakora ebhibhi, okubha tubhone amazomu.” Abhaatu abhaandi bharatwiitaamirirya kubha tureegya ego, nawe enye niragaamba, abhaatu bhayo bhoosi bharatemwa kuriing’aana na amabhi gaabhu.

*Atariho omuutu we eheene embere wa Taatabhugya*

---

\* 3:4 Rora Zaburi 51:4.

<sup>9</sup> Ambe, tubhugebhwi? Tubhuge kubha etwe Abhayahudi tuno obhweera kukira abhaatu abhaandi bhano bhatari Abhayahudi? Zeyi! Kya bhurya niamariri okweerekya, Abhayahudi na bhano bhatari Abhayahudi, bhoosi bharabhaahwa ne ebhibhi.

<sup>10</sup> Ni kyeego Amakaamo Amahoreeru gakubhuga,

“Atariho omuutu we eheene embere wa Taatabhugya, naabhe owumwe.

<sup>11</sup> Atariho omuutu wuno akumenya amang’ana ga Taatabhugya,

kweeki atariho wuno akumukomya okumumenya.

<sup>12</sup> Abhaatu bhoosi bhatigiri okumwiigwa Taatabhugya,

bhoosi bhatakweenderwa kweeki embere waaye.

Atariho omuutu wuno akukora amazomu, atariho naabhe owumwe.”†

<sup>13</sup> “Eminwa gyaabhu ni kye eziimbiihira zino ziri mwasi,

Eziindimi zyaabhu ziragaamba orurimi.”‡

“Okurwa muminwa gyaabhu,

gararwa amang’ana go obhusuungu kya bhwe enzoka.”§

<sup>14</sup> “Eminwa gyaabhu giizwiiri amang’ana go okwiihiima,

na amang’ana go obhururu.”\*

<sup>15</sup> “Amaguru gaabhu garaanguhira kugya okwiita.

---

† **3:12** Rora Zaburi 14:1-3, 53:1-3; Omurwaazi 7:20. ‡ **3:13** Rora Zaburi 5:9. § **3:13** Rora Zaburi 140:3. \* **3:14** Rora Zaburi 10:7.

16 Hohoosi hano bhakugya,  
bharasarya no okusikya.

17 Bhatamenyiri kwiikara kwo omureembe  
hamwe na abhaandi.”†

18 “Bhatakumusuuka Taatabhugya kimwe.”‡

19 Ambe, etwe tumenyiri kubha, hano  
Amakaamo Amahoreeru gakugaamba iguru ye  
emigiro, garagaambira abhaatu bhano  
bhaaheerwe emigiro gya Musa. Emigiro  
gikatuurwa, okubha bhoosi bhataaza kubha no  
obhwiitaamiriryo bhwo okwiisasaama hano  
Taatabhugya araatinire ekiina ekyaaro.  
Erarorekana kubhweero kubha, abhaatu bhoosi  
bhareenderwa okutinirwa ekiina na  
Taatabhugya.

20 Atariho omuutu wowoosi wuno akubharwa  
kubha we eheene embere wa Taatabhugya kwo  
okugwaata emigiro gya Musa. Emirimo gye  
emigiro giyo, ni kweerekya kubha abhaatu  
bhoosi ni bhatemya bhe ebhibhi.

### *Omuutu arabharwa kubha we eheene kwo okumwiikirirya Yeesu*

21 Nawe bhoono, Taatabhugya atweerekirye  
enzira yo okubharirwa bhe eheene embere  
waaye, ne etari kwe enzira ye emigiro. Naabhe  
amakaamo ge emigiro gya Musa na amakaamo  
ga abharooti garabhuga mwaasi amang’ana  
gayo.

22 Enzira yiyo niyo okumwiikirirya Yeesu  
Krisito. Abhaatu bhoosi bhano  
bhakumwiikirirya Yeesu Krisito, Taatabhugya

---

† 3:17 Rora Isaya 59:7-8. ‡ 3:18 Rora Zaburi 36:1.

arabhabhara bhe eheene embere waaye.  
Atakuhiingirirya omuutu wowoosi,

<sup>23</sup> kwo okubha abhaatu bhoosi bhakoriri  
ebhibhi no obhwiikari bhwaabhu  
bhutakweerekye obhuguungo bhwa  
Taatabhugya.

<sup>24</sup> Nawe kwo orubhaango rwa Taatabhugya,  
bharabharirwa kubha abhaatu bhe eheene  
embere waaye, okutama okumuriha kyokyoosi.  
Bhatuuriibhwe okurwa mubhibhi bhyaabhu  
okuhitira Krisito Yeesu. §

<sup>25</sup> Taatabhugya akamukora Yeesu abhe  
ekimweeso kyo okwiigwaania abhaatu na  
Taatabhugya, okubha abhaatu bhaabhirwe  
ebhibhi bhyaabhu, kwo okwiikirirya kubha  
Yeesu akakwa kwiiguru waabhu. Taatabhugya  
akakora ego, okubha yeerekye kubha ni we  
eheene, kwo okubha akagumira, ataabhatemiri  
kwe ebhibhi bhino bhaakoriri eriibhaga ri  
inyuma.

<sup>26</sup> Akakora ego, okubha yeerekye eheene yaaye  
mwiibhaga rino, okubha abhe we eheene kwo  
okubharira omuutu wuno akumwiikirirya Yeesu  
kubha ni we eheene embere waaye.

<sup>27</sup> Kweego, turanagya okwiiguungya? Zeyi,  
kwe ekigirye naabhe etwe tutakubharirwa  
kubha abhaatu bhe eheene embere wa  
Taatabhugya kwo okukora amazomu, nawe kwo  
okumwiikirirya Yeesu omweene.

<sup>28</sup> Tumenyiri kubha Taatabhugya niwe  
akubharira omuutu we eheene kwo

---

§ 3:24 Rora Abhaefeso 1:7; Abhakorosai 1:14.

okumwiikirirya Yeesu omweene, etari kwo okugwaata emigiro gya Musa.

<sup>29</sup> Mbe, Taatabhugya ni Taatabhugya wa Abhayahudi abheene, etari wa bhano bhatari Abhayahudi bhoosi? Niigo, Taatabhugya ni Taatabhugya wa abhaatu bhoosi!

<sup>30</sup> Ariho Taatabhugya wumwe ego, kweeki eriho enzira yimwe ego yo okubhabharira abhaatu kubha bhe eheene embere waaye. Abhayahudi na abhaatu bhano bhatari Abhayahudi, bhoosi bhariikiribhwa na Taatabhugya kubha bhe eheene kwo okumwiikirirya Yeesu omweene.

<sup>31</sup> Bhoono mbe, hano tukukumiirirya okumwiikirirya Yeesu, ni bhwaheene no okugaamba kubha emigiro gya Musa gitana bhweera? Zeyi, naabhe hasuuhu! Nawe hano tukumwiikirirya Yeesu, niho tukubha tukuunaanirye goosi gano emigiro gya Musa gyeerekirye.

## 4

*Aburhamu yaari we eheene embere wa Taatabhugya kwo obhwiikirirya bhwaaye*

<sup>1</sup> Igabhwi Taatabhugya akamubharira taata weetu Aburhamu\* kubha omuutu we eheene embere wa Taatabhugya?

<sup>2</sup> Eraabhe heene Aburhamu akabharirwa kubha omuutu we eheene embere wa Taatabhugya kutuukana na amahokya gaaye amazomu, niho yiingabheeri ne ekigiro kyo

---

\* **4:1 Aburhamu.** Rora eng'ana yino mu Bhugaruri bhwa Amang'ana Amakong'u.

okwiizuungya. Nawe obhuheene ni kubha, ataari na kyokyoosi kyo okwiizuungirya embere wa Taatabhugya.

<sup>3</sup> Amakaamo Amahoreeru garabhuga, “Aburahamu akamwiikirirya Taatabhugya, kweego Taatabhugya akamubharira kubha omuutu we eheene embere waaye.”†

<sup>4</sup> Ambe, hano omuutu akukora emirimo, amariho gaaye gatari saambo, nawe ni kigiro kino akweenderwa arihwe.

<sup>5</sup> Nawe omuutu wuno atakwiisigira amahokya gaaye omweene, nawe aramwiikirirya Taatabhugya niwe akumubhara kubha we eheene, ambe, Taatabhugya aramura obhwiikirirya bhwo omuutu wuyo, no okumwiikirirya kubha omuheene. Aramubharira kubha omuutu we eheene kutuukana no obhwiikirirya bhwaaye.

<sup>6</sup> Ni kyo omutemi Daudi yabhugiri iguru yo orubhaango rwo omuutu wuno Taatabhugya akumubharira kubha we eheene kutama okuroreerera amahokya gaaye. Akabhuga,

<sup>7</sup> “Bhatweereerwe ebhite, abhaatu bhano Taatabhugya abhaabhiiri amabhi gaabhu no okubharuusiryaho ebhibhi bhyaabhu.

<sup>8</sup> Atweereerwe ebhite, omuutu wuno Omukuru, Taatabhugya atakubhara ebhibhi bhyaaye.”‡

<sup>9</sup> Bhoono, orubhaango ruyo ni kwiiguru ya abhaatu bhano bhasaarirwe ego, kasi na kubhaatu bhano bhatakusaarwa? Nirabhahiitya Amakaamo Amahoreeru gano gakubhuga,

---

† 4:3 Rora Obhweemero 15:6. ‡ 4:8 Rora Zaburi 32:1-2.

Taatabhugya akamubharira Aburhamu kubha omuutu we eheene kutuukana no obhwiikirirya bhwaaye. §

<sup>10</sup> Nawe ekatuuka ryoori? Taatabhugya akamubharira Aburhamu kubha omuutu we eheene eriibhaga rino yaari asaairwe, kasi hano yaari akyaari kusaarwa? Ekatuuka akyaari kusaarwa!

<sup>11</sup> Okusaarwa kwa Aburhamu kwaari ekyeerekenio kino kikeerekyia kubha Taatabhugya akamubhara we eheene kutuukana no obhwiikirirya bhwaaye, yiingabha yaari akyaari kusaarwa. Kwe enzira yiyo, Aburhamu akakorwa kubha wiise wa abhiikirirya bhoosi, naabhe wa bhano bhakyaari kusaarwa, okubha naabhe ebho bhabharwe kubha bhe eheene embere wa Taatabhugya.

<sup>12</sup> Ego niigo, Aburhamu yakorirwe kubha wiise wa abhaatu bhano bhakusaarwa, eraabhe bharamwiikirirya Taatabhugya. Aburhamu ni wiise waabhu bhano bhakumwiikirirya Taatabhugya, kyeego akamwiikirirya Taatabhugya naabhe akyaari kusaarwa.

<sup>13</sup> Taatabhugya akaragania Aburhamu na abhaatu bho orwiibhuro rwaaye kubha, arabhagabhya ekyaaro kyoosi kibhe engabho yaabhu.\* Taatabhugya ataarageenie ego kwo okubha Aburhamu yaari arakuunaania emigiro, nawe kwe ekigirirye yaari aramwiikirirya Taatabhugya. Niho Taatabhugya akamubharira Aburhamu kubha we eheene embere waaye.

---

§ 4:9 Rora Obhweemero 15:6.  
22:17-18.

\* 4:13 Rora Obhweemero

14 Eraabhe abhaatu bhe emigiro  
bhiingasuung'aaniri gano Taatabhugya  
yarageenie kwo okubha bharakuunaanania  
emigiro, niho obhwiikirirya ku Taatabhugya  
bhutiingabheeri no obhweera. Kweeki, obhurage  
bhwa Taatabhugya nabhwo bhuungabheeri  
bhwo orurimi,

15 kwo okubha okusarya emigiro, kurareeta  
obhutemwa. Nawe kyeego gitariho emigiro, niho  
kutana okusarya emigiro.

16 Kiyo nkyo kikugirya obhurage bhwa  
Taatabhugya bhwiisige obhwiikirirya ego, kwe  
ekigirirye bhuriisigira orubhaango rwaaye.  
Kweego, goosi gano bhaaraganiibhwe abhaatu  
bhoosi bho orwiibhuro rwa Aburhamu, gabhe  
ge eheene, etari ku Bhayahudi abheene bhano  
bhakukuunaanania emigiro, nawe na kubhano  
bhakumwiikirirya Taatabhugya kyeego  
Aburhamu yakoriri. Aburhamu niwe taata  
weetu etwe twoosi bhano tukumwiikirirya  
Taatabhugya.

17 Ni kyeego Taatabhugya yamubhuuriiri  
Aburhamu mu Makaamo Amahoreeru,  
“Nikutuuriri obhe wiise we ebhyaaro bhyaaru.”†  
Aburhamu yaheerwe obhurage bhuyo okurwa  
ku Taatabhugya, hano yamwiikiiriye  
Taatabhugya wuno akubhaha abhaku obhuhoru,  
na wuno akuswaagya ebhigiro bhibheho bhino  
bhitaakabheeriho.

18 Hano Aburhamu yaabhuuriirwe  
amang'ana gayo, kwaari kukong'u okugiikirirya.  
Nawe akageenderera okwiikirirya no okwiisiga

† 4:17 Rora Obhweemero 17:5.

kubha, Taatabhugya aramukora abhe wiise we ebhyaaro bhyaaru, kwo okubha Taatabhugya yaari amubhuuriiri, “Abhaatu bho orwiibhuro rwaazo bharabha bhaaru kye eziinzota.”‡

<sup>19</sup> Eriibhaga riyo, Aburhamu yaari ne emyaaka igana rimwe (100). Akamenya kubha, omubhiri gwaaye gwaari kyamuna gukuuri, na Saara omukari waaye yaari muguumba. Nawe, obhwiikirirya bhwa Aburhamu bhutaasuuhiri.

<sup>20</sup> Kweeki, ataari no obhwiitiimaati bhwoobhwoosi iguru yo obhurage bhuno Taatabhugya yamurageenie. Nawe akageenderera kugumira mubhwiikirirya no okumuguungya Taatabhugya,

<sup>21</sup> kwo okubha akamenya kwo obhuheene kubha Taatabhugya aranagya kukora gano yamurageenie.

<sup>22</sup> Ni kutuukana no obhwiikirirya bhuyo Taatabhugya akamubhara kubha omuutu we eheene embere waaye. §

<sup>23</sup> Bhoono, amang’ana gano garabhuga, “Taatabhugya akamubhara kubha omuutu we eheene embere waaye,” gatakaamirwe kwiiguru wa Aburhamu omweene.

<sup>24</sup> Nawe gaakaamirwe naabhe iguru weetu twoosi bhano tukwiikiiriribhwa kubha bhe eheene, na bhano tukumwiikirirya Taatabhugya wuno yamuryooriri Yeesu Omukuru weetu okurwa mubhaku.

<sup>25</sup> Taatabhugya akamuruusya Yeesu, okubha akwe kwiiguru we ebhibhi bhyeetu, no

---

‡ 4:18 Rora Obhweemero 15:5. § 4:22 Rora Obhweemero 15:6.

okumuryoora okurwa mubhaku, okubha etwe tubharwe bhe eheene embere waaye.

## 5

### *Orubhaango rwo okwiikirirya Taatabhugya*

<sup>1</sup> Ambe, Taatabhugya atubhariri bhe eheene embere waaye, kutuukana no obhwiikirirya bhweetu. Kweego, tuno omureembe na Taatabhugya kwo okuhitira Omukuru weetu Yeesu Krisito.

<sup>2</sup> Kwe enzira yo okumwiikirirya Yeesu, Taatabhugya atuheeri orubhaango rwaaye. Naabhe bhoono turageenderera okusuung'aana orubhaango ruyo. Turazomererwa bhukong'u, kwe ekigirirye turiisigira kubha hamwe na Taatabhugya mubhuguungo bhwaaye.

<sup>3</sup> Zitari ziyo ezyeene, naabhe ziraatuuzeku eziinyaako zyozyoosi, etwe turageenderera kuzomererwa, kwe ekigirirye tumenyiri eziinyaako zirateetera obhwiikong'eererya.

<sup>4</sup> Obhwiikong'eererya nibhwo bhukutureetera obhukararu, no obhukararu nabhwo bhuratureetera eriisigo.

<sup>5</sup> Eriisigo riyo ritakunagya kutusuukya, kwo okubha Taatabhugya atutuuriiri obhuseegi bhwaaye muziikoro zyeetu, okuhitira Ekoru Muhoreeru wuno yatuheeri.

<sup>6</sup> Ambe, hano etwe twaari tukyaari bhanyookobhu, Krisito akaaza akakwa kwiiguru weetu abhabhi, kwe eriibhaga rino rikiiseegwa.

<sup>7</sup> Eheene, ni kukong'u kumuutu wowoosi yiikirirye okwiitwa kwiiguru yo omuutu we

eheene. Hamwe eraturikana okwiiruusya okukwa kwiiguru wo omuutu omuzomu.

<sup>8</sup> Nawe Taatabhugya akatweerekya kubha aratuseega bhukong’u, kwo okumuruusya Krisito akwe kwiiguru weetu, hano etwe twaari tukyaari abhaatu bhe ebhibhi.

<sup>9</sup> Bhoono, kwo okubha tubharirwe bhe eheene embere wa Taatabhugya kwe enzira yo oruku rwa Yeesu Krisito, eheene turatuuribhwa neewe okurwa kubhutemwa bhwa Taatabhugya.

<sup>10</sup> Hano etwe twaari tukyaari abhabhisa bhaaye, Taatabhugya akatwiigwaania etwe neewe okuhitira oruku rwo Omwaana waaye. Kweego, kyeego tugwaatenwe okuhitira oruku rwaaye, eheene turatuuribhwa okurwa kubhutemwa bhwa Taatabhugya kwo okuhitira obhuhoru bhwo Omwaana waaye.

<sup>11</sup> Ambe, kutuuma gayo goosi, Taatabhugya atukoriri tuzomererwe bhukong’u, kwe ekigirirye kyo okuhitira Omukuru weetu Yeesu Krisito kubha twiigwaaniri na Taatabhugya.

*Adaamu akatureetera oruku, nawe Yeesu atuheeri obhuhoru*

<sup>12</sup> Ambe, ebhibhi bhikasikira mukyaaro kumuutu wumwe, niho bhikagirya oruku. Kutuukana na riyo, abhaatu bhoosi bharakwa, kwe ekigirirye bhoosi ni bhatemya bhe ebhibhi.

<sup>13</sup> Kweema hano Adaamu yakoriri ebhibhi tee hano Musa yaheerwe emigiro, ebhibhi bhyaari bhireho mukyaaro. Nawe Taatabhugya ataabhabhariiri abhaatu kubha abhasarya bhe emigiro, kwe ekigirirye kye emigiro gikyaari gireho.

14 Bhoono, abhaatu bhoosi bhe eribhaga riyo, bhakakwa. Oruku rukabhaaha, naabhe bhataakoriri ebhibhi bhyo okusarya obhuswaagyo bhwa Taatabhugya kya Adaamu.

Ambe, Adaamu yaari ekireengyo kya Yeesu Krisito wuno akuuza ibhaga riindi.

15 Ebhibhi bhya Adaamu bhitakuriing'aana no orubhaango rwa Taatabhugya. Ebhibhi bhyo omuutu wumwe, Adaamu, bhikakora abhaatu bhoosi bhakwe. Nawe ariho omuutu owuundi, Yeesu Krisito, ewe arabhaha abhaatu bhaaru esaambo yo orubhaango rwa Taatabhugya. Orubhaango ruyo rwa Taatabhugya rutana ekireengo, rurakira bhukong'u ebhibhi bhya Adaamu!

16 Bhuriho obhwaahuri bhukuru gati ye ekihaanwa kyo orubhaango rwa Taatabhugya ne ebhibhi bhya Adaamu. Hano ebhibhi bhyakorirwe na Adaamu, Taatabhugya akatinira ekiina abhaatu no okubhaha obhutumwa. Nawe hano ebhibhi bhyaaru bhyakorirwe na abhaatu, Taatabhugya arabhabharira abhaatu kubha bhe eheene, kwe ekigirirye kye esaambo yo orubhaango rwaaye.

17 Ebhibhi bhyo omuutu owumwe, bhikagirya oruku rubhaahe abhaatu bhoosi. Nawe eheene bhoono, abhaatu bhoosi bhano bhakusuung'aana orubhaango rwa Taatabhugya runo rutana ekireengo, bharabharirwa kubha bhe eheene. Bhayo bharakaangata mubhuhoru bhwa kirakeego, kuhitira owumwe wurya, Yeesu Krisito.

18 Kweego, kyaabhurya abhaatu bhoosi bhaatiniirwe ekiina kutuukana ne ebhibhi bhyo

omuutu owumwe, egoego abhaatu bhoosi  
bharabharirwa kubha bhe eheene no  
okuhaanwa obhuhoru bhwa kirakeego,  
kutuukana ne eheene yo omuutu owumwe.

<sup>19</sup> Omuutu owumwe akaanga okumwiigwa  
Taatabhugya, akagirya abhaatu bhoosi bhabhe  
abhaatu bhe ebhibhi. Egoego, omuutu owumwe  
wuno akamwiigwa Taatabhugya, aragirya  
abhaatu bhabhe bhe eheene embere wa  
Taatabhugya.

<sup>20</sup> Emigiro gya Musa gikaaza, gikagirya ebhibhi  
bhyaaruhe. Naabhe ego, hano ebhibhi  
bhikaaruha, orubhaango rwa Taatabhugya  
narwo rukaaruha.

<sup>21</sup> Ambe, ebhibhi bhyaari na amanaga go  
okukaangata abhaatu no okubhagirirya oruku.  
Egoego, orubhaango rwa Taatabhugya  
rurabhaaha abhaatu, kwo okubhabharira kubha  
bhe eheene. Rurabhaha obhuhoru bhwa  
kirakeego, kuhitira ku Mukuru weetu Yeesu  
Krisito.

## 6

### *Yeesu niwe akuhiza amanaga ge ebhibhi*

<sup>1</sup> Bhoono tubhugebhwi? Mbe, tugeenderere  
okukora ebhibhi, okubha Taatabhugya  
ageenderere kutuhaana orubhaango rwaaye?

<sup>2</sup> Zeyi, naabhe hasuuhu! Etwe tubheeri kyeego  
abhaku kwa amang'ana go okukora ebhibhi.  
Kweego, tutakunagya okugeenderera kwiikara  
kweeki mubhibhi.

<sup>3</sup> Mumenye kubha, hano twabatiizirwe,  
tukagwaatana na Krisito Yeesu muruku rwaaye.

<sup>4</sup> Kweego, tukabhiikwa hamwe neewe kwe enzira yo okubatiizwa kwo oruku rwaaye. Kyeego, Krisito yaryoorirwe okurwa mubhaku kwa amanaga makuru ga Taatabhugya Taata, no okutuukana na riyo, naabhe etwe turanagya kwiikara obhwiikari bhuhya.

<sup>5</sup> Eraabhe twagwaateeni na Krisito kwe enzira yo okukwa kyeego ewe, turagwaatana neewe egoego kwe enzira yo okuryoorwa kyeego ewe.

<sup>6</sup> Tumenyiri kubha eziiteemo zyeetu zye ekare zikakwa hamwe na Krisito kumusaraba, okubha amanaga ge ebhibhi muusi weetu gatatubhaaha kweeki, no okutukora tubhe abhagya bhe ebhibhi.

<sup>7</sup> Omuutu akukwa kwe etuubho yiyo, abheeri omuutu omwiiragaanzi bhukong'u okurwa mumana ge ebhibhi.

<sup>8</sup> Eraabhe tukuuri hamwe na Krisito, turiikirirya kubha turiikara hamwe neewe.

<sup>9</sup> Tumenyiri kubha Krisito akaryooka okurwa mubhaku, na atakukwa kweeki. Oruku rutana obhuturo kweeki iguru waaye.

<sup>10</sup> Hano yakuuri, akakwa maanga rumwe ego kwiiguru yo okuhiza ebhibhi bhyoosi.\* Bhoono ari muhoru, na ariikara kwiiguru yo okumuzomera Taatabhugya.

<sup>11</sup> Kweego neemwe, mubhe muriirora kubha mukakwa hamwe neewe, ne ebhibhi bhitakunagya okubhakaangata kweeki. Egoego,

---

\* **6:10** Abhayahudi bhaari ne eziinyaangi zyo okuruusya ekimweeso kyo obhwiigwaani na Taatabhugya maanga rumwe kumwaaka. Bhaari bharyoorera kukora ego kwo omwaaka. Nawe Yeesu akarusibhwa ekimweeso maanga rumwe ego.

mubhe muriirora kubha bhoono muri bhahoru, na muriikara kwiiguru yo okumuzomera Taatabhugya, kwo okugwaatana na Krisito Yeesu.

<sup>12</sup> Kweego, mutiikirirya ebhibhi bhibhaahe emibhiri gyeenyu gino gikukwa. Mutiikirirya okurutwa ne eziinaamba eziimbiihu zye emibhiri gyeenyu.

<sup>13</sup> Mutiikirirya ebhiimo bhyeenyu bhyo omubhiri bhikore emirimo gye ebhibhi, nawe mwiirusye ku Taatabhugya ne ebhiimo bhyeenyu bhibhe ebhigiro bhyo okukora obhuheene.

<sup>14</sup> Ebhibhi bhitakubhabhaaha kweeki, kwe ekigirirye mutakukaangatwa no obhuturo bhwe emigiro, nawe murakaangatwa no orubhaango rwa Taatabhugya.

### *Orubhaango rwa Taatabhugya ruragirya abhiikirirya okukora eheene*

<sup>15</sup> Bhoono tubhugebhwi? Mbe, tugeenderere okukora ebhibhi, kwe ekigirirye tutakukaangatwa no obhuturo bhwe emigiro, nawe turakaangatwa no orubhaango rwa Taatabhugya? Zeyi, naabhe hasuuhu!

<sup>16</sup> Mutamenyiri kubha, mukwiirusya kumuutu no okukora gano akweenda, niho mubheeri muramwiigwa kyeego abhagya bhaaye?† Ambe, kyeego mukubha muriirusya okukora ebhibhi, murabha abhagya bhe ebhibhi, na amaaza gaaku ni ruku. Nawe mukubha muriirusya okumwiigwa Taatabhugya,

---

† **6:16** Rora Yohana 8:34.

murabha abhagya bha Taatabhugya, na amaaza gaaku ni bhwiikari bhwe eheene.

<sup>17</sup> Ekare, emwe mwaari abhagya bhe ebhibhi. Nawe niramubhuurira, “Ozomirye, Taatabhugya,” kwe ekigirirye bhoono mwiikiriirye kwe eziikoro zyeenyu zyoosi okwiigwa ameegyo ga Krisito gano mwasuung’aaniri.

<sup>18</sup> Bhoono, Taatabhugya amariri kubhaha obhwiiragaanzi, okubha mutabha abhagya bhe ebhibhi. Abhakoriri kubha abhagya bhaaye, okubha mubhe murakora amang’ana ge eheene.

<sup>19</sup> Nigaambiri neemwe kwo okuhokeerya ekireengyo kiyu kyo obhugya, okubha mumenye kino nikugaamba. Ekare, mwaari muraruusya emibhiri gyeenyu okukora amang’ana amanyaka, mwaari abhagya bhe ebhibhi, ne ebhibhi bhyeenyu bhikaaruha bhukong’u. Nawe bhoono, mubhe muraruusya emibhiri gyeenyu ku Taatabhugya, mubhe abhagya bha amang’ana ge eheene, okubha mweeribhwe na Taatabhugya.

<sup>20</sup> Ekare, hano mwaari abhagya bhe ebhibhi, mwaari abhiiragaanzi okwaanga kukora amang’ana ge eheene.

<sup>21</sup> Nawe mbe, mukabhona obhweeraki kutuukana na amahokya geenyu amabhi, gano gakubhakora bhoono kurora eziisoni? Bhutariho obhweera bhwobhwoosi! Amang’ana gayo garareeta oruku rwa kirakeego.

<sup>22</sup> Bhoono muheerwe obhwiiragaanzi na Taatabhugya, okubha mutabha abhagya bhe ebhibhi. Kweeki, abhakoriri kubha abhagya

bhaaye, no okutuukana na gayo mubhweeni obhweera. Obhweera bhuyo ni kweeribhwa no okusuung'aana obhuhoru bhwa kirakeego.

<sup>23</sup> Omuutu wowoosi wuno ni mugya we ebhibhi, amariho gaaye ni ruku rwa kirakeego. Nawe etwe, Taatabhugya aratuhaana obhuhoru bhwa kirakeego. Obhuhoru bhuyo bhutari amariho, nawe ni saambo yino tukusuung'aana kuhitira Krisito Yeesu, Omukuru weetu.

## 7

### *Abhiikirirya bhatari iyaasi we emigiro gya Musa*

<sup>1</sup> Abhahiiri bhaane, niragaamba neemwe, abhaatu bhano mumenyiri bhuzomu emigiro gya Musa. Mumenyiri kubha omuutu areenderwa okugwaata emigiro eriibhaga ryoosi akubha akyaari muhoru.

<sup>2</sup> Hiinga, nigarure eriing'ana riyo kwe ekireengyo. Emigiro girabhuga, omukari atakweenderwa kumutiga omusubhe waaye hano omusubhe waaye akyaari muhoru. Nawe eraabhe omusubhe waaye akuuri, niho akubha no obhwiiragaanzi okurwa kumigiro giyo.

<sup>3</sup> Kweego, akukweerwa no omusubhe owuundi hano musubhe waaye akyaari muhoru, arabha omuseebheeti. Nawe eraabhe omusubhe waaye akuuri, emigiro giyo gitakumubhoha kweeki, aranagya okukweerwa no omusubhe owuundi, naabhe atari museebheeti.

<sup>4</sup> Abhahiiri bhaane, amang'ana gayo niigo gari kweemwe kweeki. Naabhe emwe mutakubhohwa kweeki ne emigiro gya Musa, kwo okubha mukuuri hamwe na Krisito

kumusaraba. Bhoono emwe ni bhaatu bhaaye, wuno yaryoorirwe okurwa mubhaku, kwiiguru yo obhwiikari bhweetu bhubhe ne emisumo emizomu kwiiguru wa Taatabhugya.

<sup>5</sup> Eriibhaga rino enaamba yeetu yo omubhiri ekyaari eratubhaaha, emigiro gikakora eziinaamba zyeetu eziimbiihu zibhe na amanaga bhukong'u kweetwe, tukiigoomba okukora ebhibhi eriibhaga ryoosi. Kutuukana na riyo, oruku rukabhaho.

<sup>6</sup> Twaari tubhohirwe ne emigiro, nawe bhoono tukuuri hamwe na Krisito, na kweego tubhweeni obhwiiragaanzi okurwa mumigiro. Bhoono tutakumuhokeerya Taatabhugya kwe enzira ye ekare yo okugwaata emigiro gino gyakaamirwe, nawe kwe enzira ehya yo okukaangatwa ne Ekoru Muhoreeru.

### *Ebhibhi bhiramenyekana kwe emigiro*

<sup>7</sup> Bhoono tubhugebhwi? Tubhuge emigiro ni mibhi? Zeyi, naabhe hasuuu! Nawe eraabhe emigiro gitaangabheeriho, nitaari kumenya kubha ebhibhi ni kigiroki. Kyeego gitaangabheeriho emigiro gino gikubhuga, “Otiigoomba ekigiro kyo omurikyaaazo,”\* nitaari kumenya kubha okwiigoomba ekigiro kyo omuutu owuundi, ni kukora ebhibhi.

<sup>8</sup> Nawe kwe enzira ye emigiro, ebhibhi bhikiimukya eziinaamba eziimbiihu zya tuubho nzaru muusi waane. Eraabhe emigiro giyo gitaangabheeriho, ebhibhi bhyaari bhirabha bhitana amanaga.

---

\* [7:7 Rora Okurwa 20:17; Obhuhiiti bhwe Emigiro 5:21.](#)

<sup>9</sup> Kwe eribhaga rino niari nitamenyiri emigiro, niari niriikara kyeego bhurya nikweenda. Nawe hano niamenyiri emigiro, nikang'ura kubha ebhibhi bhina amanaga bhukong'u na bhirareeta oruku.

<sup>10</sup> Nikarora kubha emigiro giyo, gino gyaari kwiiguru yo okuuniha obhuhoru, gikaanireetera oruku.

<sup>11</sup> Ebhibhi bhikaaning'eena kwe enzira ye emigiro giyo, no okunireetera oruku.

<sup>12</sup> Naabhe ego, emenyekane kubha, emigiro ni mihoreeru, no obhuswaagyo bhwaaye nabhwo ni bhuhoreeru, ni bhwe eheene, kweeki ni bhuzomu.

<sup>13</sup> Nawe eraabhe niigo, ni kigiro ekizomu kino kinireeteeri oruku? Zeyi, naabhe hasuuhu! Ebhibhi nibhyo bhikaanireetera oruku kwe enzira ye emigiro gino giri mizomu. Gaari amiiseego ga Taatabhugya kubha emigiro gibhe gireerekyia kubhweero, ebhibhi ni kigiro kibhiihu bhukong'u.

<sup>14</sup> Tumenyiri kubha emigiro gikarusibhwa na Taatabhugya, nawe enye kwe esimuka yaane ye ebhibhi, ni mugya we ebhibhi.

<sup>15</sup> Enye nitakumenya kino nikukora. Niraseega kukora gano nikweenda, niho nitakugakora. Na gano nikubhihirirya bhukong'u, nigo nikukora.

<sup>16</sup> Eraabhe niramanya gano nikukora gatari mazomu, obhumenyi bhuno bhureerekyia kubha niriikirirya kubha emigiro ni mizomu.

<sup>17</sup> Hayo obhona etari enye wuno nikukora eng'ana yiyo, nawe ni bhhibhi bhino bhiri muusi waane.

<sup>18</sup> Nimenyiri kubha, kweenye, kusimuka yaane ye ebhibhi, kitarimu ekigiro ekizomu kyokyoosi. Ndeenda okukora amazomu, nawe nitana obhunagya bhwo okukora.

<sup>19</sup> Amang'ana amazomu gano nikweenda kukora, nitakukora. Kweeki, amabhiihu gano nitakweenda okukora, niragakora.

<sup>20</sup> Bhoono, eraabhe nirakora gano nitakweenda nikore, hayo etari enye wuno nikukora ebhibhi, nawe ni bhibi bhino bhiri muusi waane.

<sup>21</sup> Ambe, ning'uriri kubha, hano nikweenda okukora ekigiro ekizomu, obhona nirarutwa okukora ekigiro ekibhiihu.

<sup>22</sup> Emigiro gya Taatabhugya, niragiseega kwe ekoro yaane yoosi.

<sup>23</sup> Nawe ning'uriri kubha omubhiri gwaane, obhona gurabhaahwa na amanaga ge ebhibhi bhino bhikuhizana na amiiseego gaane amazomu. Kiyi nikyo kikukora nibhe omugya we ebhibhi bhino bhiri muusi waane.

<sup>24</sup> Ndaaza kurora! Ni weewi wuno araanituurye okurwa mubhwiikari bhwaane bhuno bhukubhaawa ne ebhibhi no oruku?

<sup>25</sup> Niramubhuurira, "Ozomirye, Taatabhugya," kwe ekigirirye ewe niwe anituurirye, kuhitira Yeesu Krisito, Omukuru weetu.

Kweego ambe, enye omweene, ndahokeerya emigiro gya Taatabhugya kwa amiiseego gaane, nawe kwe esimuka yaane ye ebhibhi, obhona nirahokeerya emigiro gye ebhibhi.

*Abhiikirirya bharakaangatibhwa ne Ekoru Muhoreeru*

<sup>1</sup> Ambe bhoono, Taatabhugya atakubhatinira ekiina no okubhaha okubhatema abhaatu bhano bhagwaateeni na Krisito Yeesu.

<sup>2</sup> Kwe enzira yo okugwaatana na Krisito Yeesu, amanaga ge Ekoru Muhoreeru wuno akureeta obhuhoru bhwa kirakeego, ganituuriri nibhe omwiiragaanzi, okubha nitige okukaangatwa na amanaga ge ebhibhi no oruku.

<sup>3</sup> Emigiro gya Musa gyaari gitana amanaga go okututuura obhwiiragaanzi, kwe ekigirirye kye esimuka yeetu ye ebhibhi. Nawe kino emigiro giyo gitaanagirye okukora, Taatabhugya akakora. Akaragania Omwaana waaye omweene, yiize kweetwe mukyaaro akubha omuutu kyeego etwe bhe ebhibhi, okubha abhe ariiruusya kyeego ekimweeso kwiiguru we ebhibhi bhyeetu. Kwo okukora ego, Taatabhugya akasikya amanaga ge ebhibhi mubhwiikari bhweetu.

<sup>4</sup> Taatabhugya akakora ego, okubha amang'ana goosi ge eheene gano gakweenderwa mumigiro gakuunaane bhuzomu muusi weetu. Etwe turakaangatibhwa ne Ekoru Muhoreeru, na tutakukaangatibhwa kweeki ne esimuka yeetu ye ebhibhi.

<sup>5</sup> Abhaatu bhano bhakukaangatibhwa ne esimuka yaabhu ye ebhibhi, bhariiseega amang'ana go omubhiri. Nawe bhano bhakukaangatibhwa ne Ekoru Muhoreeru, bhariiseega okukora amahokya gano gakumuzomera Ekoru Muhoreeru.

<sup>6</sup> Abhaatu bhano bhakukaangatibhwa na amiiseego ge esimuka ye ebhibhi, bharabhona oruku rwa kirakeego. Nawe abhaatu bhano bhakukaangatibhwa na amiiseego ge Egoro Muhoreeru, bharabhona obhuhoru bhwa kirakeego no omureembe.

<sup>7</sup> Abhaatu bhano bhakukaangatibhwa ne esimuka yaabhu ye ebhibhi, bhayo ni bhabhisa bha Taatabhugya. Bhatakwiikirirya okugwaata emigiro gyaaye, kweeki bhatakunagya okugigwaata.

<sup>8</sup> Kweego, abhaatu bhano bhakukaangatibhwa ne esimuka yaabhu ye ebhibhi, bhatakunagya okumuzomera Taatabhugya.

<sup>9</sup> Nawe bhoono emwe, mutakukaangatwa ne esimuka weenyu ye ebhibhi, nawe murakaangatwa ne Egoro wa Taatabhugya, kwo okubha ariikara muusi weenyu. Omuutu wowoosi wuno atana Egoro wa Krisito, \* wuyo heene atari omwaanamweega wa Krisito.

<sup>10</sup> Bhoono, Krisito ariikara muusi weenyu. Kweego, naabhe eraabhe emibhiri gyeenyu girakwa kutuukana ne ebhibhi, Egoro Muhoreeru arabhaha obhuhoru, kwe ekigirirye Taatabhugya abhabhariri kubha bhe eheene embere waaye.

<sup>11</sup> Egoro Muhoreeru wuno akwiikara muusi weenyu, niwe Egoro wa Taatabhugya wuno akamuryoora Krisito Yeesu okurwa mubhaku. Kweego, Taatabhugya araryoora naabhe emibhiri gyeenyu gino gikukwa, kwa amanaga

---

\* **8:9 Egoro wa Krisito** niwe *Egoro wa Taatabhugya*, kasi *Egoro Muhoreeru*.

ge Ekoro Muhoreeru wuno akwiikara muusi weenyu.

<sup>12</sup> Kweego, abhahiiri bhaane, etakweenderwa etwe twiikare kwo okukaangatwa ne esimuka yeetu ye ebhibhi.

<sup>13</sup> Eraabhe muriikara kwo okukaangatwa ne esimuka yeenyu ye ebhibhi, murakwa. Nawe, muryaange bhukong’u kwe eziinguru zye Ekoro Muhoreeru kukora amang’ana gano esimuka yeenyu ye ebhibhi ekweenda mukore, muriikara kirakeego.†

<sup>14</sup> Bhoosi bhano bhakukaangatibhwa ne Ekoro wa Taatabhugya, bhayo nibho abhaana bha Taatabhugya.

<sup>15</sup> Taatabhugya ataabhaheeri Ekoro Muhoreeru okubha mubhe kweeki abhagya bhano bhakwoobhoha, nawe akabhaha Ekoro waaye okubha mubhe abhaana bhaaye. Ekoro wuyo niwe akusakirya okumubhirikira Taatabhugya, “Taata weetu.”

<sup>16</sup> Ekoro wuyo omweene aragaamba muziikoro zyeetu kubha, etwe ni bhaana bha Taatabhugya.

<sup>17</sup> Ambe, eraabhe etwe ni bhaana bha Taatabhugya, tubheeri abhagabhi bhaaye. Turasuung’aana engabho yeetu hamwe na Krisito. Nawe kino kikweenderwa kweetwe bhoono ni kubha, twiisaangye munyaako hamwe na Krisito, okubha na neetwe tuguungibhwe hamwe neewe.

*Taatabhugya araguungya abhaana bhaaye*

<sup>18</sup> Enye nirarora kubha, enyaako yeetu ye eriibhaga rino, etari ekigiro, nikugariing’ania

† 8:13 Rora Abhagaratia 6:8.

no obhuguungo bhuno Taatabhugya akutuhaana mwiibhaga rino rikuuza.

<sup>19</sup> Ebhigiro bhyoosi bhino bhyateemirwe, bhiraganya kwe enaamba kuru eriibhaga rino Taatabhugya areerekye kubha bhaweewi nibho abhaana bhaaye.

<sup>20</sup> Ebhigiro bhyoosi bhino bhyateemirwe, bhikiihimwa. Etari kubha ebhyeene bhikeenda ego, nawe ni kyeego bhurya Taatabhugya omweene akeenda.‡ Naabhe ego, bhiraganya kwe eriisigo eriibhaga riyo,

<sup>21</sup> kwe ekigirirye bhiraturibhwa okurwa obhugya bhwo obhusarya no oruku. Hayo niho bhiraahaanwe obhwiiragaanzi no obhuguungo bhuno Taatabhugya araabhahe abhaana bhaaye.

<sup>22</sup> Tumenyiri kubha, tee bhoono ego, ebhigiro bhyoosi bhino bhyateemirwe bhirarwaara kwo obhuhaari, kyeego obhuhaari bhwo omukari wuno akwiibhura omwaana.

<sup>23</sup> Kweeki, etari kubha ni bhigiro bhiyo ebhyeene nibhyo bhikurwaara, nawe naabhe etwe bhano tuheerwe Ekoru Muhoreeru okubha tusame obhuzomu bhuno turaahaabhwe, turarwaara muziikoro zyeetu. Turarwaara, kwe ekigirirye turaganya bhukong'u eriibhaga rino Taatabhugya araatukuunaanie kubha abhaana bhaaye. Hayo niho turaaturibhwe okurwa mubhusarya bhwoosi no okuahaanwa emibhiri emihya.

<sup>24</sup> Tunaryo eriisigo kweema hano Taatabhugya yatutuurirye. Nawe eraabhe turiisiga ekigiro

---

‡ **8:20** Rora Obhweemero 3:17.

kino tukukirora, riyo ritari eriisigo. Mbe, weewi ariisiga kuhaanwa ekigiro kino anakyo?

<sup>25</sup> Nawe tukwiisigira okuhaanwa ekigiro kino tutakukirora, niho tukwiigumirirya okuganya okutama okukwa emitwe.

<sup>26</sup> Hamwe na gayo, Ekoru Muhoreeru niwe akutusakirya mubhunyookobhu bhweetu. Etwe tutamenyiri okumusabha Taatabhugya kyeego tukweenderwa, nawe Ekoru Muhoreeru omweene niwe akutusabhira ku Taatabhugya kwo okurwaara kuno kutakuhaywa.

<sup>27</sup> Taatabhugya wuno ahiisuunza goosi gano gari muziikoro zyeetu, niwe amenyiri amiiseego ge Ekoru Muhoreeru, kwe ekigirirye Ekoru wuyo, arasabhira abhahoreeru bha Taatabhugya kyeego bhurya Taatabhugya akuseega.

<sup>28</sup> Tumenyiri kubha, mumang'ana goosi, Taatabhugya arakora emirimo hamwe na bhoosi bhano bhakumuseega, kwo okubhaha amazomu, § bhano bhabhirikiirwe kutuukana no obhuseegi bhwaaye.

<sup>29</sup> Taatabhugya akamenya abhaatu bhaaye kweema ekyaaro kikyaari okubhuumbwa. Bhayo nibho akabhasora bhabhe kyeego Omwaana waaye Yeesu Krisito ari. Akakora ego okubha Omwaana waaye abhe omwiibhurwa wo okutaanga gati wa abhahiiri bhaaru.

---

§ 8:28 Obhugazuro obhuundi bhuratura kubha, *Amang'ana goosi garareeta amazomu kubhaatu bhoosi bhano bhakumuseega Taatabhugya, kasi Mumang'ana goosi, Taatabhugya arakora emirimo hamwe na abhaatu bhoosi bhano bhakumuseega okubha abhahe amazomu.*

<sup>30</sup> Ambe, bharya yaari abhasoriri, nibho bhano yabhabhirikiiri, bhano akabhara bhe eheene, nibho bhano yarageenie kubha arabhaha obhuguungo.

*Abhiikirirya bhatakunagya kutwaanikanibhwa no obhuseegi bhwa Taatabhugya*

<sup>31</sup> Ambe, tubhugebhwi bhoono iguru ya amang'ana gayo? Eraabhe Taatabhugya ari rubhaara rweetu, ni weewi wuno akunagya kutuhiza?

<sup>32</sup> Taatabhugya ataamuroreeri ebhigoongi Omwaana waaye omweene, nawe akamuruusya okubha akwe kwiiguru weetu bhoosi. Eraabhe akakora ego, mbe, atakutura kutuhaana amazomu agaandi?

<sup>33</sup> Ni weewi wuno akunagya okuzoongera abhasorwa bha Taatabhugya? Atariho, kwo okubha Taatabhugya omweene niwe akubhabhara bhe eheene!

<sup>34</sup> Kweeki ni weewi wuno akututinira ekiina? Atariho, kwo okubha Krisito Yeesu yakuuri no okuryoorwa, na yikeeri orubhaara rwo obhuryo rwa Taatabhugya, ewe niwe akutusabhira.

<sup>35</sup> Ni kigiroki kino kikunagya okututwaanikania no obhuseegi bhwa Krisito? Kitariho! Eraabhe turi munyaako kuru, turi munzagara, turi mutooga, turi munzara, turasuhirwa emyeenda, turiisukira okubhurya obhuhoru, kasi okwiitwa, Krisito arageenderera kutuseega.

<sup>36</sup> Ni kyeego Amakaamo Amahoreeru gakubhuga,

“Eziisiku zyoosi twiisiri oruku, kwe ekigirirye  
turakuhokeerya awe.

Turakorerwa kyeego eziing’oondu zino  
zikuhirwa okugwaaga.”\*

<sup>37</sup> Nawe yiingabha gayo goosi garatuuzaku, etwe  
turageenderera okuhiza, kwo okubha  
turasakiribhwa na Krisito wuno akutuseega.

<sup>38-39</sup> Nimenyiri kwo obhuheene kubha kitariho  
ekigiro kino kikunagya okututwaanikania no  
obhuseegi bhwa Taatabhugya. Taatabhugya  
arageenderera kutuseega, eraabhe turi bhahoru  
kasi tukuuri. Naabhe bhamaraika, kasi bho  
obhukaangati bhano bhari kwiisaaro, kasi  
ebhigiro bhya amanaga bhatakunagya  
okututwaanikania no obhuseegi bhwaaye.  
Naabhe amang’ana gano gakutuuka mwiibhaga  
rino kasi mwiibhaga rye embere, kasi kyokyoosi  
kino kiri mwiisaaro naabhe nyaari, kasi  
kyokyoosi mukyaaro, kitariho ekigiro kino  
kikunagya okututwaanikania no obhuseegi  
bhwa Taatabhugya. Obhuseegi bhuyo  
Taatabhugya abhukuundukwiiri kweetwe  
okuhitira ku Krisito Yeesu, Omukuru weetu.

## 9

*Pauro ariiyigwa obhururu kwe ekigirirye kya  
abhaatu bha Iziraeri*

<sup>1</sup> Krisito amenyiri kubha, kino nikugaamba  
bhoono ni bhuheene. Naabhe omutima gwaane  
guno gukukaangatibhwa ne Ekoru Muhoreeru,  
nagwo guranierekya nitakugaamba orurimi.

---

\* **8:36** Rora Zaburi 44:22.

<sup>2</sup> Eheene, enye nine ebhigoongi bhukong'u no obhururu bhuhaari mukoro

<sup>3</sup> kwe ekigirirye kya abhaatu bhe ekyaaro kyaane. Eraabhe yaangaturikeeni, niingiikiriirye okwiihiimwa omweene no okwaahurwa na Krisito, eraabhe okukora ego kuungabheeri kurasakirya abhahiiri bhaane bhayo bhamwiikirirye Krisito.

<sup>4</sup> Bhayo nibho Abhiiziraeri, abhaatu bhano Taatabhugya yabhasoriri bhabhe abhaana bhaaye, akabheerekya obhuguungo bhwaaye no okukora amaragano\* nabho. Kweeki akabhaha emigiro gyaaye, hamwe no obhurage bhwaaye, na akabheerekeererya kyeego ekweenderwa bhamuseengere.

<sup>5</sup> Abhiiziraeri bhayo nibho abhiibhurwa bha bhazaazi bhaabhu Aburhamu, Isaaka na Yaakobo. Krisito kubhwiibhurwa bhwaaye, ewe ni Mwiiziraeri. Krisito ni Taatabhugya, Omukuru wa bhyoosi, akumibhwe kirakeego!† Gabhe ego.

<sup>6</sup> Nitakugaamba kubha Taatabhugya akatamwa kukuunaanania obhurage bhwaaye ku Bhiiziraeri. Etari ego, kwo okubha Abhiiziraeri bhoosi bhatari abhaatu bha Taatabhugya.

<sup>7</sup> Etari kubha abhiibhurwa bhoosi bha Aburhamu nibho abhaana bhaaye bhe eheene. Kweego Taatabhugya akamuraganania Aburhamu, “Orwiibhuro rwaazo ruratuuka ku Isaaka.”‡

---

\* **9:4 Amaragano.** Rora *eriiragano* mu Bhugaruri bhwa Amang'ana Amakong'u. † **9:5** Obhugazuro obhuundi bhuratura kubha, *Taatabhugya, Omukuru wa bhyoosi, akumibhwe kirakeego!* ‡ **9:7** Rora *Obhweemero* 21:12.

<sup>8</sup> Obhugazuro bhwa amang'ana gayo ni kubha, abhaana bha Taatabhugya bhatari abhaana bhoosi bha Aburhamu bhano bhakiibhurwa kwo omubhiri, nawe ni bhiibhurwa bhaaye bhano bhakiibhurwa kuriing'aana no obhurage bhwa Taatabhugya.

<sup>9</sup> Taatabhugya yaari arageenie kubha, “Nirakyoora omwaaka guno gukuuza eriibhaga kya rino, na Saara arabha no omwaana we ekisubhe.”§

<sup>10</sup> Kweeki etari riyo ego, nawe Rebeka omukari wa zaazi weetu Isaaka akamwiibhurira bhaana mbasa.

<sup>11-12</sup> Hano eziimbasa ziyo zyaari zikyaari kwiibhurwa, na hano zyaari zikyaari kukora kyokyoosi kibhe ekizomu kasi kibhiihu, Taatabhugya akamubhuurira Rebeka, “Omukuru aramuhokeerya omusuuhu waaye.”\* Eriing'ana riyo rireerekya kubha Taatabhugya aramubhirikira omuutu kuriing'aana na amiiseego gaaye, etari kuriing'aana ne eteemwa yo omuutu wurya.

<sup>13</sup> Ni kyeego Amakaamo Amahoreeru gakubhuga, “Yaakobo nimwiikiriiryey, nawe Esau nimwaangiri.”†

### *Taatabhugya arakora kyeego akweenda*

<sup>14</sup> Bhoono tubhugebhwi? Tubhuge Taatabhugya atari we eheene? Zeyi, naabhe hasuuhu!

<sup>15</sup> Taatabhugya omweene akamubhuurira Musa, “Enye niramurorera ebhigoongi omuutu

---

§ 9:9 Rora Obhweemero 18:10, 14. \* 9:11-12 Rora Obhweemero 25:23. † 9:13 Rora Maraaki 1:2-3.

wuno nikweenda kumurorera ebhigoongi, no okumwaabhira wuno nikweenda okumwaabhira.”‡

16 Kweego, Taatabhugya niwe akutura okumurorera omuutu ebhigoongi bhyaaye, etari kwo omukya kasi amiiseego go omuutu.

17 Rora, mu Makaamo Amahoreeru Taatabhugya akamubhuurira Farao, “Nikakutuura obhe omutemi, okubha nierekye abhaatu obhunagya bhwaane kuhitira awe, ne eriina ryaane ribhe rirarwaazwa mukyaaro kyoosi.”§

18 Kweego ambe, Taatabhugya aramurorera ebhigoongi omuutu wuno akweenda, no okumukora omuutu owuundi wuno akweenda abhe ne egoro kong’u.

19 Bhoono, hamwe omuutu aranagya akabhuurya, “Eraabhe niigo eri, kwaki Taatabhugya araririirira omuutu wowoosi? Ni weewi wuno akunagya kwaanga amiiseego ga Taatabhugya gano akweenda kukora?”

20 Nawe awe omuutu, awe ni weewi kubhuurirania na Taatabhugya? Mbe, ekigiro kyo obhutoto kiranagya kubhuurirania na wuno yakikoriri no okubhuurya, “Kwaki onibhuumbiri ego?”\*

21 Etari kubha omubhuumbi we ebhibhiga ano obhunagya bhwo okukorera obhutoto kyeego akweenda? Aranagya kubhuumba ebhibhiga bhibiriri kwo obhutoto bhuyo akonyiri, ekibhiga

---

‡ 9:15 Rora Okurwa 33:19. § 9:17 Rora Okurwa 9:16. \* 9:20 Rora Isaya 29:16, 45:9.

kimwe kibhe kwiiguru yo orusiku rwa abhagini,  
ne ekiindi iguru ye eziisiku zyoosi.

<sup>22</sup> Niigo eri ku Taatabhugya. Akeenda  
okweerekya abhaatu obhuhaari bhwaaye na  
amanaga gaaye, nawe akagumirira bhukong'u  
abhaatu bhano bhakeenderwa kusikibhwa.

<sup>23</sup> Akakora ego, okubha abhone okweerekya  
obhuguungo bhwaaye obhukuru kwiiguru wa  
abhaatu bhano akabhanura okusuung'aana  
ebhigoongi bhyaaye. Akiiseega kweema ekare  
bhabhone obhuguungo bhwaaye.

<sup>24</sup> Gati wa abhaatu bhano yabhirikiiri, turimu  
naabhe etwe. Ataabhirikiiri Abhayahudi  
abheene, nawe na bhano bhatari Abhayahudi.

<sup>25</sup> Kiyo nikyó kino Taatabhugya abhugiri  
mukitabhu kyo omurooti Hosea,  
“Abhaatu bhano bhatari bhaane,  
nirabhabhirikira, ‘Abhaatu bhaane.’  
Abhaatu bhano nitaabhaseegiri,  
nirabhabhirikira, ‘Abhaseegwa bhaane.’”†

<sup>26</sup> Kweeki abhugiri,  
“Harya hano bhakabhuurirwa, ‘Emwe mutari  
abhaatu bhaane,’  
hayo niho bhakubhirikirwa, ‘Abhaana bha  
Taatabhugya wuno ari muhoru.’”‡

<sup>27</sup> Kweeki, omurooti Isaya abhugiri iguru ya  
Abhiiziraeri,  
“Eraabhe Abhiiziraeri ni bhaaru kya amarobha  
ga kurung'ongo rwe enyaanza,  
nawe bhano bhakutuuiribhwa, ni bhasuuu.

<sup>28</sup> Omukuru, Taatabhugya arabhaha abhaatu bhe  
ekyaaro kyoosi

† 9:25 Rora Hosea 2:23. ‡ 9:26 Rora Hosea 1:10.

obhutemwa bhuno bhukuunaaniri kutama  
okukeezera,  
kyeego yabhugiri.”§

<sup>29</sup> Ni kyeego omurooti Isaya yabhugiri ekare,  
“Etiingabheeri Omukuru wo Obhunagya  
Bhwoosi asaagirye abhiibhurwa  
bhasuuhu bha Abhiiziraeri,  
tuungabheeri tusikiri bhoosi kya abhaatu bha  
Sodoma na Gomora.”\*

*Abhiiziraeri bhaaru bhatari bhe eheene embere wa Taatabhugya*

<sup>30</sup> Ambe, tubhugebhwi bhoono iguru wa  
amang’ana gayo? Abhaatu bhano bhatari  
Abhiiziraeri bhataakoriri omukya kubha  
abhaatu bhe eheene embere wa Taatabhugya,  
nawe Taatabhugya akabhabhara bhe eheene  
kwe ekigirirye kyo okumwiikirirya Krisito.

<sup>31</sup> Abhiiziraeri bhaari bharakora omukya  
okugwaata emigiro gya Musa okubha  
bhabharwe bhe eheene embere wa Taatabhugya,  
nawe bhataanagirye.

<sup>32</sup> Kwaki bhataabharirwe kubha bhe eheene  
embere wa Taatabhugya? Ni kwo okubha  
bhakiiseega amahokya gaabhu na  
bhataamwiikiriirye Krisito. Krisito niwe eriigina  
rino bhiikuzirye,

<sup>33</sup> kyeego Taatabhugya akabhuga mu  
Makaamo Amahoreeru,  
“Rora, nituuriri eriigina Sayuni.  
Eriigina riyo niryo rino abhaatu bhakwiikuzaku,  
na riragirirya abhaatu bhabhe bharagwa.

§ 9:28 Rora Isaya 10:22-23. \* 9:29 Rora Isaya 1:9; Obhweemero  
19:24-25.

Nawe omuutu wowoosi wuno araamwiikirirye  
wuyo,  
niwe eriigina riyo,  
atakusuukibhwa na rumwe!”†

## 10

<sup>1</sup> Abhahiiri bhaane, ndeenda kwe ekoro yaane  
yoosi kubha Abhiiziraeri bhatuuribhwe. Kiyo  
nikyo nikubhasabhira bhukong’u ku  
Taatabhugya.

<sup>2</sup> Ndabhabhuurira emwe, abhaatu bhayo,  
bhano omukya okumukomya Taatabhugya,  
naabhe bhatakumenya kyeego Taatabhugya  
aseegiri bhamukomye.

<sup>3</sup> Kwo okubha bhataayimenyiri eheene yino  
ekurwa ku Taatabhugya, bhakamoohya  
okutuura eheene yaabhu abheene, bhatiituuriri  
iyaasi we eheene ya Taatabhugya.

<sup>4</sup> Krisito akakuunaanania emigiro gyoosi gya  
Musa, okubha abhaatu bhoosi bhano  
bhakumwiikirirya ewe, bhabharwe bhe eheene  
embere wa Taatabhugya.

### *Abhaatu bhoosi bharanagya okutuuiribhwa*

<sup>5</sup> Musa akakaama iguru yo okubharwa we  
eheene embere wa Taatabhugya kwe enzira yo  
okugwaata emigiro, “Omuutu wuno akukora  
gano gakweenderwa ne emigiro, arabha ariikara  
kwo okugwaata emigiro giyo.”\*

<sup>6</sup> Nawe iguru yo okubharwa we eheene embere  
wa Taatabhugya kwe enzira yo okumwiikirirya,  
Musa akabhuga, “Mutiibhuurya muziikoro

† 9:33 Rora Isaya 8:14, 28:16.

\* 10:5 Rora Abharaawi 18:5.

zyeenyu, ‘Ni weewi wuno akunagya okugya tee mwiisaaro?’” Okugaamba ego ni kyeego okumusabha Krisito yiize hano mukyaaro.

<sup>7</sup> “Kweeki mwaamure muziikoro zyeenyu, ‘Ni weewi wuno akunagya okwiika tee nyaari?’†” Kwo okugaamba ego ni kyeego tukweenda okumuryoora Krisito.

<sup>8</sup> Nawe kino kikugaambwa mu Makaamo Amahoreeru ni kubha, “Eng’ana ya Taatabhugya eri haguhi na naawe, eri mumunwa gwaazo na eri mukoro yaazo.”‡ Bhoono, eng’ana yiyo niyo eng’ana yino tukurwaaza iguru yo okumwiikirirya Yeesu Krisito.

<sup>9</sup> Eng’ana yiyo ni kubha, oribhuga kwo omunwa gwaazo omweene, “Yeesu ni Mukuru,” no okwiikirirya mukoro yaazo kubha Taatabhugya akamuryoora okurwa mubhaku, oraturibhwa na Taatabhugya.

<sup>10</sup> Omuutu akwiikirirya Yeesu Krisito kwe egoro yaaye, niho arabharwa we eheene embere wa Taatabhugya. Kweeki akwiikirirya obhwiikirirya bhwaaye kwo omunwa gwaaye, araturibhwa.

<sup>11</sup> Amakaamo Amahoreeru garabhuga, “Omuutu wuyo woosi wuno akumwiikirirya, atakusuukibhwa na rumwe!”§

<sup>12</sup> Amang’ana gayo gareerekyamba kubha bhutariho obhwaahuri gati wa Abhayahudi kasi bhano bhatari Abhayahudi. Ewe ni Mukuru wa bhoosi, wo obhuniibhi kubhoosi bhano

---

† **10:7** *Nyaari.* Rora eng’ana yino mu Bhugaruri bhwa Amang’ana Amakong’u. ‡ **10:8** Rora Obhuhiiti bhwe Emigiro

30:12-14. § **10:11** Rora Isaya 28:16.

bhakumusabha.

<sup>13</sup> Ni kyeego Amakaamo Amahoreeru gakubhuga, “Omuutu wuyo woosi wuno akusabha kwo okwiisiga eriina ryo Omukuru, araturibhwa.”\*

<sup>14</sup> Bhoono, erabhabhwi abhaatu bharanagya okumusabha eraabhe bhakyaari kumwiikirirya? Kweeki igabhwi bharanagya okumwiikirirya eraabhe bhakyaari kwiigwa iguru waaye? Na igabhwi bharanagya okwiigwa iguru waaye eraabhe bhakyaari okurwaazirwa?

<sup>15</sup> Kweeki igabhwi abhaatu bharanagya kugya okurwaaza amang’ana gayo eraabhe bhakyaari kutumwa? Ni kyeego Amakaamo Amahoreeru gakubhuga, “Okuhika kwo omuutu wuno akureeta Amang’ana Amazomu, kurabha kurazomera abhaatu!”†

<sup>16</sup> Naabhe ego, bhatari Abhiiziraeri bhoosi bhakiikirirya Amang’ana Amazomu gayo, bhaaru bhaangiri. Omurooti Isaya akabhuga, “Omukuru, ni weewi wuno yikiriirye amang’ana geetu?”‡

<sup>17</sup> Kweego, obhwiikirirya bhuratuukana no okwiigwa amang’ana, na amang’ana gayo garatuukana no okurwaazirwa eng’ana ya Krisito.

<sup>18</sup> Ambe, eraabhe niigo, nibhuurye eriibhuuryo. Mbe, Abhiiziraeri bhakyaari okwiigwa amang’ana gayo? Ni heene bhakiigwa, kyeego Amakaamo Amahoreeru garabhuga,

---

\* **10:13** Rora Yoeri 2:32. † **10:15** Rora Isaya 52:7. ‡ **10:16** Rora Isaya 53:1.

“Amang’ana gaabhu gakiigweerwa mukyaaro  
kyoosi,

na amang’ana gaabhu gakahika naabhe tee  
obhuteero bhwe ekyaaro.”§

<sup>19</sup> Nibhuurye eribhuuryo eriindi kweeki. Mbe,  
hano Abhiiziraeri bhakiigwa amang’ana gayo,  
bhataagamenyeekereerye? Ni heene  
bhakagamenyeekererya, kwo okubha eribhaga  
rya Musa, Taatabhugya akabhabhuurira  
Abhiiziraeri,

“Ndabhakora mubharorere eriihari abhaatu  
bhano bhatari abhaatu bhaane,

ndabhakora mubhe no obhururu iguru ye  
ekyaaro kya abhaatu abhageege.”\*

<sup>20</sup> Kweeki, omurooti Isaya akagaamba  
amang’ana ga Taatabhugya kwo obhukaari,

“Abhaatu bhano bhataanikomirye,  
nibho bhaniruuzi.

Na abhaatu bhano bhatakubhuurya amang’ana  
gaane,

nibho niyeerekirye kweebho.”†

<sup>21</sup> Nawe iguru wa Abhiiziraeri, Taatabhugya  
akabhuga,

“Eziisiku zyoosi nikeenda okwiigwaana na  
abhaatu bhaane,

nawe ni bhaatu bhano bhatari abhiigwa,  
kweeki ni bhaatu bhano bhakuniaanga.”‡

---

§ **10:18** Rora Zaburi 19:4. \* **10:19** Rora Obhuhiiti bhwe Emigiro  
32:21. † **10:20** Rora Isaya 65:1. ‡ **10:21** Rora Isaya 65:2.

# 11

## *Taatabhugya akyaari kwaanga Abhiiziraeri okubha abhaatu bhaaye*

<sup>1</sup> Bhoono nirabhuurya, mbe, Taatabhugya yaangiri abhaatu bhaaye? Zeyi, naabhe hasuuhu! Enye omweene ni Mwiiziraeri, okurwa murwiibhuro rwa Aburhamu, mukisyooko kya Benjamini.

<sup>2</sup> Taatabhugya ataangiri abhaatu bhaaye bhano akabhasora kweema ekyaaro kikyaari kubhuumbwa. Mutamenyiri kino Amakaamo Amahoreeru gakubhuga iguru yo omurooti Eriya hano yamuriririiri Taatabhugya iguru wa Abhiiziraeri? Akabhuga,

<sup>3</sup> “Omukuru, abhaatu bhano bhiitiri abharooti bhaazo, bhasarirye ahagiho ho okuruusirya ekinweeso. Enye nisaagiri omweene ego, neebho bhareenda kuniita!”\*

<sup>4</sup> Nawe Taatabhugya akamukyoorabhwi? Akabhuga, “Niisaagiirye abhaatu ebhikwe muhuungati (7,000) bhano bhatakuseengera Baari.”†

<sup>5</sup> Naabhe bhoono ego niigo eri, bhasaagiri abhaatu bhasuuhu bhano Taatabhugya yabhasoriri kwo orubhaango rwaaye.

<sup>6</sup> Bhasorirwe kwo orubhaango rwa Taatabhugya, kweego bhatakutuuribhwa kwe ekigirirye kya amahokya gaabhu. Kyeego bhaangatuuriibhwe kwe ekigirirye kya amahokya gaabhu, ambe orubhaango rutaangabheeri orubhaango kweeki.

---

\* **11:3** Rora 1 Abhatemi 19:10, 14. † **11:4** Rora 1 Abhatemi 19:18.

<sup>7</sup> Kweego, amang'ana gaazo gari ego.  
 Abhiiziraeri bhakakomya bhe eheene embere wa  
 Taatabhugya, nawe bhataabhweeni. Ni bharya  
 bhano bhaasorirwe na Taatabhugya, nibho  
 bhakabhona. Abhaandi bhoosi bhano  
 bhakasaaga, Taatabhugya akabhakora bhabhe  
 ne eziikoro kong'u.

<sup>8</sup> Ni kyeego Amakaamo Amahoreeru  
 gakubhuga,  
 "Taatabhugya akabhakora bhabhe ne eziikoro  
 kong'u,  
 akabharibha ameeso okubha bhatarora,  
 kweeki akabharibha amatwi okubha bhatiigwa.  
 Niigo bhari reero yino."‡

<sup>9</sup> No omutemi Daudi akabhuga,  
 "Hano bhakukora eziinyaangi zyaabhu kwo  
 obhuzomererwa,  
 Taatabhugya azikyoosye zibhe ekitiimbo kyo  
 okubhatiimbya,  
 ne ekitiimbo kyo okugwiisya,  
 na zibhe obhutemwa kweebho.

<sup>10</sup> Ameeso gaabhu gabhe mamwaamu,  
 okubha bhatarora kyokyoosi kweeki,  
 ne emigoongo gyaabhu gigeenderere okwiikiika,  
 okutuukana ne eziinyaako zyaabhu."§

*Okwaanga kwa Abhiiziraeri kubheeri orubhaango  
 kubhano bhatari Abhiiziraeri*

‡ **11:8** Rora Obhuhiiti bhwe Emigiro 29:4; Isaya 29:10. § **11:10**  
 Mumang'ana gayo ge Ezaburi, Daudi arabhuga amang'ana ga  
 abhabhisa bhaaye. Bhoono Pauro agegiri amang'ana gayo ara-  
 gagaambira amang'ana ga Abhiiziraeri bhano bhakwaanga ok-  
 wiikirirya Amang'ana Amazomu iguru yo Omukuru Yeesu. Rora  
 Zaburi 69:22-23.

<sup>11</sup> Bhoono nirabhuurya, mbe, Abhiiziraeri bhakiikuza okubha bhagwe no okusikibhwa bhukong'u? Zeyi, naabhe hasuuhu! Nawe, ni kutuukana no okwaanga kwaabhu obhutuurya bhubhahikiiri abhaatu bhano bhatari Abhiiziraeri. Kwe enzira yiyo, Taatabhugya akeenda Abhiiziraeri bhiigwe eriihari ryo okubhona obhutuurya kyeego abhaatu bhano bhatari Abhiiziraeri bhaabhweeni.

<sup>12</sup> Bhoono, abhaatu bhano bhatari Abhiiziraeri, bhakabhona orubhaango orukuru kwo okubha Abhiiziraeri bhakamwaanga Omutuurya. Ambe bharabhona naabhe orubhaango orukuru kukiraho hano Abhiiziraeri bhoosi bharaabhe bhatuuriibhwe.

<sup>13</sup> Bhoono, niragaamba na neemwe, abhaatu bhano bhatari Abhiiziraeri. Eheene Taatabhugya akaanituma nibhe omweega kwiiguru wa abhaatu bhano bhatari Abhiiziraeri. Niraguungya emirimo giyo gino niheerwe,

<sup>14</sup> nawe kwo okuhitira emirimo gyaane giyo, niriisiga kubha, Abhiiziraeri abharikyaane bhariigwa eriihari ryo okubhona obhutuurya kyeego emwe mwabhweeni, okubha abhamwe bhaabhu kweeki bhatuuribhwe.

<sup>15</sup> Rora, hano Abhiiziraeri bhaamwaangiri Omutuurya, Taatabhugya neewe yabhaangiri, akiigwaana na abhaatu bhano bhatari Abhiiziraeri. Kweego, hano Taatabhugya ariikirirya Abhiiziraeri kweeki, erabha kya abhaku bharyookiri!

<sup>16</sup> Eraabhe omuutu aramuruusirya Taatabhugya obhutoongore bhwa amagesa gaaye, ambe amagesa gaaye goosi garabha ni

kwiiguru wa Taatabhugya. Kweeki, eraabhe omuutu aramuruusirya Taatabhugya emiri gyo omuzeituni, ambe naabhe amasagya gaaku goosi garabha ni kwiiguru wa Taatabhugya.\*

<sup>17</sup> Bhoono, agamwe ga amasagya gatinirwe, na amasagya agaandi go omuzeituni gwa mwiitirigo geemiibhwe gatigati wa amasagya go okutaanga. Amasagya goosi garabhona ebhyaakurya okurwa mumiri giriyagirya gyo omuzeituni. Emwe bhoono, niimwe amasagya ge emizeituni gya mwiitirigo.

<sup>18</sup> Kweego, mutazeera amatu gano gakatinwa. Mutiizuungya, na muhiite, emiri gitakubhiisigira emwe, nawe emwe niimwe mukugiisigira emiri.

<sup>19</sup> Ahaandi muranagya okugaamba, “Amasagya gayo gakatinwa, okubha enye niemibhwe hagiho haabhu.”

<sup>20</sup> Yiyo ni heene. Amasagya gayo gakatinwa kwo okubha gatiikiriirye, na naawe ori kyeego ori kwo okubha oriikirirya. Kweego, otiizuungya, nawe omwoobhohe Taatabhugya.

<sup>21</sup> Eraabhe Taatabhugya akatema Abhiiziraeri bhano bhari simuka ya amatu ge emizeituni, naabhe awe, aranagya okukutema.

<sup>22</sup> Murore kyeego Taatabhugya akukorera obhuzomu abhaatu abhaandi, na bhurya akutema abhaatu abhaandi kwo obhutemwa obhuhaari. Aratema bhano bhakaanga okumwiikirirya, na arakukorera obhuzomu awe,

---

\* **11:16** Abhasomi bhaaru bharabhuga kubha **obhutoongore** ne **emiri gyo omuzeituni** nigyo bhazaazi bha Abhiiziraeri bhano ni Aburahamu, Isaaka na Yaakobo.

kyeego okugeenderera okumwiikirirya. Nawe kyeego oritiga okumwiikirirya, awe woosi oratinwa.

<sup>23</sup> Eraabhe Abhiiziraeri bhayo bhariikyoora no okumwiikirirya Taatabhugya, bhareemibhwa kweeki mumuzeituni gyaabhu, kwo okubha Taatabhugya ano obhunagya bhwo okweemya kweeki.

<sup>24</sup> Awe wuno otari Mwiiziraeri, awe ni kye eriitu ryo omuzeituni gwa mwiitirigo. Okatinwa no okweemibhwa mumuzeituni guno okeemibhwa na abhaatu, yiingabha kiyo ni kigiro kigini kukorwa. Bhoono ong'ure kubha, gutari murimo mukong'u ku Taatabhugya okukyoorera okweemya Abhiiziraeri bhano bhaari amatu ge emizeituni mumuti guno gwaari ni gwaabhu abheene.

### *Taatabhugya arabharorera ebhigoongi abhaatu bhoosi*

<sup>25</sup> Abhahiiri bhaane mubhwiikirirya, ndeenda mumenye iguru ya amiiseego ga Taatabhugya gano gaari giibhisiri ekare, okubha mutaaza kwiirora bha amang'eeni bhukong'u. Abhamwe bha Abhiiziraeri bharabha ne eziikoro kong'u eriibhaga iguhi ego, tee obhubhari bhukuunaane bhwa abhaatu bhano bhatari Abhiiziraeri bhasuung'aane obhutuurya.

<sup>26</sup> Kwe enzira yiyo, Abhiiziraeri bhoosi bharatuuribhwa. Ni kyeego Taatabhugya akabhuga mu Makaamo Amahoreeru,  
“Omutuurya araaza okurwa mumugye gwa  
Sayuni,

arakora abhiibhurwa bha Yaakobo bhatige  
okumwaanga Taatabhugya.

27 Hayo niho eriiragano ryaane neeryo  
riraakuunaane,

hano niraabhaabhire ebhibhi bhyaabhu.”†

28 Hano Abhiiziraeri bhaari bhaangiri  
Amang’ana Amazomu iguru wa Yeesu Krisito,  
bhakiikora kubha abhabhisa bha Taatabhugya.  
Nawe eriing’ana riyo ribheeri kwo obhweera  
bhweenyu, emwe abhaatu bhano mutari  
Abhiiziraeri. Naabhe, Taatabhugya akyaari  
aseegiri Abhiiziraeri, kwe ekigirirye yaari asoriri  
bhazaazi bhaabhu no okukora eriiragano nabho.

29 Taatabhugya araasore abhaatu bhaaye no  
okubhatweera ebhite, atakunagya okwiikyoosya  
amiiseego gaaye.

30 Ekare, emwe mutaari kumwiigwa  
Taatabhugya, nawe bhoono musuung’aaniri  
ebhigoongi bhya Taatabhugya, kwo okubha  
Abhiiziraeri bhataamwiigwiiri.

31 Kwe eheene niigo eraabhe. Bhoono  
Abhayahudi bhatakumwiigwa Taatabhugya,  
nawe bharasuung’aana ebhigoongi bhya  
Taatabhugya kyeego abhaatu bhano bhatari  
Abhayahudi bhabhweeni ebhigoongi bhya  
Taatabhugya.

32 Taatabhugya akatiga abhaatu bhoosi  
bhageenderere kumwaanga okumwiigwa no  
okubhohwa mubhwaangi bhwaabhu, okubha  
abharorere ebhigoongi abhaatu bhayo bhoosi.

*Taatabhugya akumibhwe*

† 11:27 Rora Isaya 27:9, 59:20-21; Yeremia 31:33-34.

<sup>33</sup> Weyaa! Ni weewi wuno akunagya okumenya kyeego bhuri obhuniibhi, amang'eeni no obhumenyeekererya bhwa Taatabhugya? Bhirakira okumenyeekererya kweetu! Atariho omuutu wuno akunagya okumenya obhwaamuri bhwaaye kasi amiiseego gaaye.

<sup>34</sup> Ni kyeego Amakaamo Amahoreeru gakubhuga,  
 “Ni weewi wuno akunagya okumenya amiiseego go Omukuru, Taatabhugya?  
 Ni weewi wuno akumutoongera?”<sup>‡</sup>

<sup>35</sup> “Ni weewi wuno akamuha Taatabhugya ekigiro kino Taatabhugya areenderwa kumukyoorerya?”<sup>§</sup>

<sup>36</sup> Taatabhugya niwe wuno akateema ebhigiro bhyoosi.  
 Kwo okuhitira kweewe ebhigiro bhyoosi bhirageenderera kubhaho, ne ebhigiro bhyoosi bhiriho kwiiguru wo obhuguungo bhwaaye.  
 Taatabhugya aguungibhwe kirakeego! Gabhe ego.

## 12

### *Mwiirusye obhwiikari bhweenyu mumuhokeerye Taatabhugya*

<sup>1</sup> Bhoono abhahiiri bhaane, mumenyiri kyeego Taatabhugya araturorera ebhigoongi. Kweego, nirabhiisasaama kubha, mwiirusye obhwiikari bhweenyu ku Taatabhugya. Mubhe kye

---

<sup>‡</sup> 11:34 Rora Isaya 40:13.    <sup>§</sup> 11:35 Rora Ayubu 41:11.

ebhimweeso ebhioru, ebhioreru, bhino bhikumuzomera. Okukora ego, nikwe enzira ye eheene yo okumuseengera Taatabhugya.

<sup>2</sup> Muteega eziinyaangi zya abhaatu bhe ekyaaro kino, nawe mutige Taatabhugya akyoosye eziikoro zyeenyu, okubha mubhe na amiiseego amahya. Hayo niho mureega okumenya gano Taatabhugya akubheendera. Kino akubheendera ni mang'ana amazomu, gano gakuunaaniri, kweeki gakumuzomera.

<sup>3</sup> Bhoono, Krisito aniheeri orubhaango nibhe omweega waaye. Kweego, ndabhabhuurira emwe mwoosi kubha, mutiirora kubha ni kigiro kukira kyeego mukweenderwa kubha. Amiiseego geenyu gabhe na kusuuhu kuriing'aana ne ekireengo kyo obhwiikirirya bhuno Taatabhugya yabhaheeri abhaatu bhoosi.\*

<sup>4</sup> Kyeego mumenyiri, omubhiri ni gumwe, nawe gune ebhiimo bhyaaru, ne ebhiimo bhyoosi bhirahokya emirimo egiindi.

<sup>5</sup> Ego niigo na neetwe. Etwe turi bhaaru, nawe tubheeri omubhiri gumwe kwo okugwaatana na Krisito. Mumubhiri gwaaye, abhaatu bhoosi ni bhiimo bhya abharikyaabhu, na bhane emirimo gyaabhu.

<sup>6</sup> Kweego, tuno obhuturo maanga maaru, kyeego Taatabhugya atuheeri kwo orubhaango rwaaye. Omuutu wuno aheerwe obhuturo bhwo

---

\* **12:3** Obhugazuro obhuundi bhuratura kubha, *Abhaatu bhoosi bhiireenge kuriing'aana no obhwiikirirya bhwaabhu.*

okuruusya obhurooti, ahokeerye obhuturo bhuyo kuriing'aana no obhwiikirirya bhwaaye.

<sup>7</sup> Omuutu wuno aheerwe obhuturo bhwo okubhahokeerya abharikyaaye, abhahokeerye bhuzomu. Omuutu wuno aheerwe obhuturo bhwo okweegyia, yeegyie bhuzomu.

<sup>8</sup> Omuutu wuno aheerwe obhuturo bhwo okubhatoongera ekoro abharikyaaye, akore bhuzomu. Omuutu wuno aheerwe obhuturo bhwo okuginihya abhaatu, aginihye kwe ekoro yoosi. Omuutu wuno aheerwe obhuturo bhwo obhukaangati, akaangate kwo omukya gwoosi. No omuutu wuno aheerwe obhuturo bhwe ebhigoongi, abharorerere abhaatu ebhigoongi kwo obhuzomererwa.

### *Mwiiseege*

<sup>9</sup> Museege abharikyeenyu kwo obhuseegi bhwe eheene. Mubhihirirye obhubhi, nawe mubhe murakora amazomu eriibhaga ryoosi.

<sup>10</sup> Mwiiseege emwe kwe emwe kya abhahiiri. Mukore omukya okubhasuuka abharikyeenyu.

<sup>11</sup> Mutabha bhatobhu kwo okukora emirimo gya Taatabhugya, nawe mukaangatwe ne Egoro Muhoreeru okukora emirimo giyo kwo omukya.†

<sup>12</sup> Muzomererwe kwo okubha muriisiga mazomu goosi gano Taatabhugya yarageenie. Mugumire mwiibhaga rye enyaako, na mugeenderere okumusabha Taatabhugya.

---

† **12:11 Mukaangatwe ne Egoro Muhoreeru okukora emirimo giyo kwo omukya**, obhugazuro obhuundi bhuratura kubha, mugeenderere kukora emirimo giyo kwe ekoro yoosi.

<sup>13</sup> Mubhasakirye abhahoreeru abharikyeenyu mumeendi gaabhu, na mubhe muraginihya abhagini muziinyuumba zyeenyu.

<sup>14</sup> Musabhire abhaatu bhano bhakubhanyaakya, okubha Taatabhugya abhatweere ebhite. Mutabha murabhasabhira kubha bhiihiimwe.

<sup>15</sup> Muzomererwe hamwe na bhano bhakuzomererwa, na murire hamwe na bhano bhakurira.

<sup>16</sup> Mwiikare hamwe kwa amiiseego gamwe. Mutabha muriizuungya, nawe mwiiyiikye, mubhe no obhugwaatani na abhaatu bhi iyaasi. Mutiirora emwe ni bha amang'eeni.

<sup>17</sup> Hano abhaatu bhakubhakorera obhubhi, mutabhariha obhubhi kwo obhubhi. Nawe mwiriirihе okukora amazomu embere wa ameeso ga abhaatu bhoosi.

<sup>18</sup> Mukore omukya okukora ryoryoosi rino emwe mukunagya, okubha mubhe no omureembe na abhaatu bhoosi.

<sup>19</sup> Abhaseegwa bhaane, mutariha ekisiyoomba, nawe mumutigire Taatabhugya yaamure ryo okukora. Niragaamba ego, kwo okubha mu Makaamo Amahoreeru Omukuru, Taatabhugya arabhuga, “Enye niwe wuno nikuriha ekisiyoomba.”‡

<sup>20</sup> Kweeki, Amakaamo Amahoreeru garabhuga iguru yo okutama kuriha ekisiyoomba, “Eraabhe omubhisa waazo ane enzara, omuhe ebhyaakurya.

Ne eraabhe ane enyoota, omuhe kyo okunywa.

---

‡ 12:19 Rora Obhuhiiti bhwe Emigiro 32:35.

Orikora ego, orabha kyeego omukumaniirye  
 amakara go omuriro kumutwe gwaaye.”§  
<sup>21</sup> Otahizwa na amabhi gano abhaatu  
 bhakukukorera, nawe ohize amabhi gayo kwo  
 okubhakorera amazomu.

## 13

### *Musuuke abhakaangati bhe eserikaare*

<sup>1</sup> Abhaatu bhoosi bhareenderwa bhiigwe  
 abhakaangati bhe ekitaake. Muhiite kubha,  
 obhunagya bhwaabhu bhwoosi bhwo  
 okukaangata, bhurarwa ku Taatabhugya, kweeki  
 ewe niwe akabhatuura mubhukaangati.

<sup>2</sup> Kweego, omuutu wowoosi wuno akwaanga  
 obhunagya bhwaabhu, aramwaanga  
 Taatabhugya wuno akabhatuura  
 mubhukaangati. No omuutu akukora ego,  
 ariireetera obhutini bhwe ekiina kya  
 Taatabhugya.

<sup>3</sup> Abhakaangati bhatakukaanga omuutu wuno  
 akukora amazomu, nawe wuno akukora  
 amabhiihu. Kweego, eraabhe otakweenda  
 okwoobhoha omukaangati, obhe orakora  
 amazomu, neewe arakukumya.

<sup>4</sup> Kwo obhugazuro ewe ni muhokya wa  
 Taatabhugya wuno akukora emirimo kwo  
 obhweera bhwaazo. Nawe, orikora amabhiihu,  
 mbe, oreenderwa woobhohe, kwo okubha

---

§ 12:20 *Orabha kyeego omukumaniirye amakara go omuriro kumutwe gwaaye*, abhasomi bhaaru bharabhuga obhugazuro bhwaku ni *orabha omusuukirye iguru yo obhubhi bhwaaye kwo obhuzomu bhwaazo*. Rora Eziimetari 25:21-22.

eheene ano obhunagya bhwo okukutema. Ewe ni muhokya wa Taatabhugya, okubheereky a obhuhaari bhwaaye bhano bhakukora amabhiihu.

<sup>5</sup> Kweego, mureenderwa okubhiigwa abhakaangati bhe eserikaare. Mutabhasuuka ego kwe ekigirirye kyo okwoobhoha obhuhaari, nawe mubhasuuke kwe ekigirirye mumenyiri bhuzomu mumitima gyeenyu, Taatabhugya areenda mubhe murakora ego.

<sup>6</sup> Kweeki, kwe ekigirirye kiyi, murariha eriigooti. Abhakaangati bhe eserikaare, hano bhakukora omukya kukora emirimo gyaabhu, bharamuhokeerya Taatabhugya omweene.

<sup>7</sup> Kweego, mubhe murakora amang'ana gano abhakaangati bhayo bhakweenderwa okukorerwa. Eraabhe muratunibhwa eriigooti, ambe mutobhe eriigooti. Ne eraabhe mureenderwa okumusuka omuutu, ambe mumusuuke. Obhuseegi nibhwo enzira yo okukuunaanania emigiro gya Taatabhugya.

*Obhuseegi nibhwe enzira yo okukuunaanania emigiro gya Taatabhugya*

<sup>8</sup> Mutabha muratunibhwa kyokyoosi no omuutu wowoosi, nawe okuseegana. Kwo obhugazuro wuno akumuseega omurikyaaye, wuyo niwe akukuunaanania emigiro gya Taatabhugya.

<sup>9</sup> Rora, obhuswaagyo bhurabhuga, “Otaseebheeta, otiita, otiibha, no otiigoomba ekigiro kyo omurikyaazo.”\* Nawe, emigiro giyo

\* [13:9 Rora Okurwa 20:13-17; Obhuhiiti bhwe Emigiro 5:17-21.](#)

ne egiindi gyoosi giragwaatanibhwa mumugiro gumwe guno kukubhuga, “Omuseege omurikyaazo kyeego wiiseegiri omweene.”†

<sup>10</sup> Omuutu wuno akumuseega omurikyaaye, atakumukorera obhubhi. Kweego, obhuseegi nibhwe enzira yo okukuunaanania emigiro gya Taatabhugya.

<sup>11</sup> Mubhe murakora gayo goosi, kwo okubha mumenyiri eriibhaga ryo okuruusyaho ebhigiro bhyoosi no okukora emirimo kwo omukya no okwiiriiha kyo omuutu wuno amariri okubhuuka okukora emirimo. Rora, eriibhaga ryo obhutuurya bhweetu riri haguhi bhukong’u, kukira kubhutaangiro hayo hano twataangiri okumwiikirirya Yeesu.

<sup>12</sup> Bhoono, obhutiku bhuhwiiri, no orusiku oruhya ruriisuka okutaanga. Kweego, tutige amahokya amabhiihu gano gakukorwa mukiirima, na tugwaate ebhigwaato bhyo obhweero.

<sup>13</sup> Tubhe ne eteemwa nzomu kya abhaatu bhano bhakwiikara mubhweero bhwo orusiku. Tutabha abhaatu bhano bhakukora eziinyaangi zyo okunywa amaanzi go omuzabibu no obhunywi obhuraara. Tutakora etuubho yoyoosi yo obhutuungiri, naabhe okukora amang’ana ge eziisoni. Tutabha bhe eniku no omugono.

<sup>14</sup> Nawe bhoono, mubhwiikari bhweenyu bhwoosi, mubhe murakaangatwa no Omukuru Yeesu Krisito. Mutiikirirya naabhe hasuuhu okukaangatwa ne esimuka yeenyu ye ebhibhi kasi okutuna eziinaamba zyeenyu eziimbiihu.

---

† **13:9** Rora Abharaawi 19:18.

# 14

## *Mutatinira ekiina abhiikirirya abharikyeenyu*

<sup>1</sup> Mumwiikirirye omwiikirirya omurikyeenyu wuno akyaari kukong'a mubhwiikirirya bhwaaye. Mutahakana neewe iguru ya amiiseego gaaye go okuhabhana na ageenyu.

<sup>2</sup> Omuutu wuno akong'iri mubhwiikirirya bhwaaye, ararora kubha aranagya kurya kyokyoosi kirya, nawe owuundi wuno akyaari kukong'a mubhwiikirirya bhwaaye, kubha ariikiriribhwa kurya eziinyenyi ezyeene.

<sup>3</sup> Omuutu wuno akurya kyokyoosi kirya, atamuzeera owuundi wuno akurya eziinyenyi ezyeene. No omuutu wuno akurya eziinyenyi ezyeene, neewe atamutinira ekiina owuundi wuno akurya kyokyoosi kirya, kwo okubha Taatabhugya amwiikiririirye kyeego ari.

<sup>4</sup> Awe otana obhuturo bhwobhwoosi bhwo okutinira ekiina omuhokya wo omuutu owuundi, gino nigyo emirimo gyo omukuru waaye. Na Taatabhugya ni mukuru wa bhoosi, ewe niwe araamure omuhokya waaye, asarirye kasi zeyi. No omuhokya waaye arakora kyeego ekweenderwa, kwo okubha Omukuru Yeesu ano obhunagya bhwo okumwiimeererya abhe arakora ego.

<sup>5</sup> Omuutu owumwe ararora orusiku orurebhe runo obhweera kukira orusiku oruundi, nawe omuutu owuundi ararora eziisiku zyoosi ziri bhwaheene. Abhaatu bhoosi bheerekye mubhwoongo bhwaabhu abheene.

<sup>6</sup> Omuutu wuno akurora orusiku orurebhe runo obhweera kukira orusiku oruundi, arakora

ego kwe ekigirirye areenda okumuzomera Omukuru Yeesu. No owuundi wuno akurya kyokyoosi kirya, arakora ego kwe ekigirirye areenda okumuzomera Omukuru Yeesu. Atakunagya kurya kyokyoosi kutama okubhuga, “Ozomirye, Taatabhugya.” No owuundi wuno akurya eziinyenyi ezyeene, arakora ego kwe ekigirirye areenda okumuzomera Omukuru Yeesu. Wuyo woosi aramubhuurira, “Ozomirye, Taatabhugya.”

<sup>7</sup> Niragaamba ego, kwo okubha atariho omuutu gati weetu wuno akwiikara kwiiguru waaye omweene, naabhe wuno akukwa kwiiguru waaye omweene.

<sup>8</sup> Eriibhaga rino turi bhahoru, turiikara kwiiguru yo Omukuru Yeesu. Ne eriibhaga rino tukukwa, turakwa kwiiguru wo Omukuru Yeesu. Kweego, tukubha abhahoru kasi turaakwe, etwe ni bhaatu bhaaye.

<sup>9</sup> Krisito akakwa no okuryooka, okubha abhe Omukuru wa abhaatu bhoosi, abhaku na abhahoru.

<sup>10</sup> Bhoono, awe ni weewi okumutinira ekiina omwiikirirya omurikyaaazo? Kwaki oramuzeera? Etwe twoosi turiimeerera embere we ekituumbi kyo omuriinga kya Taatabhugya, na aratina ekiina gati weetu.

<sup>11</sup> Ni kyeego Amakaamo Amahoreeru gakubhuga,  
“Eheene, Omukuru, Taatabhugya abhugiri,  
abhaatu bhoosi bharahigama embere waane,  
na abhaatu bhoosi bharanikumya kwe eziindimi

zyaabhu.”\*

<sup>12</sup> Kweego, abhaatu bhoosi gati weetu, bhariigaamba abheene embere wa Taatabhugya.

*Otamutiindya omurikyaazo*

<sup>13</sup> Kweego, tutiitinira ekiina. Twaamure okutiga kukora kyokyoosi kino kikugirya omwiikirirya omurikyeetu agwe.

<sup>14</sup> Okutuukana na ameegyo go Omukuru Yeesu, nimenyiri kwo obhuheene kubha, bhitariho ebhyaakurya bhyobhyoosi bhya amakire.† Nawe eraabhe omuutu ararora ebhyaakurya ebhirebhe ni bhinyaka, hayo niho ebhyaakurya bhiyo bhikubha ebhinyaka kweewe.

<sup>15</sup> Kweego, kya awe orimugirya omwiikirirya omurikyaazo abhe ne ebhigoongi bhukong’u mukoro yaaye, hano okurya ebhyaakurya ebhirebhe, hayo niho orabha otakukaangatwa no obhuseegi kumurikyaazo. Ambe, otiikirirya, kwe enzira ye ebhyaakurya bhyazo, omubhurye omuutu wuno Krisito yamukweereeri!

<sup>16</sup> Ekigiro kino okurora ni kizomu kwaawe, nawe abharikyaazo bhararora kubha ni kibhi, otakikora.

<sup>17</sup> Amang’ana go obhutemi bhwa Taatabhugya‡ gatari amang’ana iguru yo okurya kasi okunywa, nawe ni iguru yo okukora eheene, kubha no omureembe no okwiikara kwo obhuzomererwa. Gayo goosi garaturikana kwo obhusakirya bhwe Ekoru Muhoreeru.

---

\* **14:11** Rora Isaya 45:23. † **14:14** Rora Mariko 7:18-20.  
‡ **14:17** *Obhutemi bhwa Taatabhugya* ni hagiho hayo hoosi hano Taatabhugya niwe omukaangati. Rora amang’ana gano mu Bhugaruri bhwa Amang’ana Amakong’u.

<sup>18</sup> Omuutu wowoosi wuno akumuhokeerya Krisito ego, aramuzomera Taatabhugya, kweeki ariikiriribhwa na abhaatu.

<sup>19</sup> Kweego ambe, tukore omukya erii bhaga ryoosi kukora amang'ana gano gakureeta omureembe, na gano gakugumirya abharikyeetu mubhwiikirirya.

<sup>20</sup> Otasarya emirimo gya Taatabhugya kwo okurya ebhyaakurya bhyobhyoosi bhino okweenda. Eheene, ebhyaakurya bhyoosi bhiriikiribhwa okuriibhwa, nawe ni kibhi kumuutu okurya ebhyaakurya bhyobhyoosi bhino bhikugirya omurikyaaye agwe.

<sup>21</sup> Hakiriku otige okurya eziinyama, kasi okunywa amaanzi go omuzabibu, § kasi okukora kyokyoosi kino kikunagya kumutiindya omurikyaazo.

<sup>22</sup> Bhoono awe, kirya okwiikirirya iguru ye eriing'ana riyo, kibhe gati waazo na Taatabhugya omweene. Hakiriku omuutu wuno atakwiitinira ekiina hano akukora kigiro kino okurora kubha kiri kisi.

<sup>23</sup> Nawe, omuutu wowoosi wuno ano obhwiitiimaati iguru ye ebhyaakurya bhino akurya, wuyo aratinirwa ekiina na Taatabhugya, kwe ekigirye, omuutu wuyo ariikirirya kino akukora ni kibhiihu embere wa Taatabhugya. Kyeego omuutu akukora kyokyoosi kino atakwiikirirya kubha ni kisi, hayo niho akoriri ebhibhi.

---

§ 14:21 *Amaanzi go omuzabibu.* Rora amang'ana gano mu Bhugaruri bhwa Amang'ana Amakong'u.

## 15

<sup>1</sup> Ambe, etwe bhano tukong'iri mubhwiikirirya bhweetu, tureenderwa tukong'erye abharikyeetu bhano bhakyaari kukong'a mubhwiikirirya bhwaabhu. Tubhasakirye mubhunyookobhu bhwaabhu, na tutakora amang'ana gano gakutuzomera etwe abheene ego.

<sup>2</sup> Etwe twoosi gati weetu, tukore omukya okukora amang'ana go okumuzomera abhiikirirya abharikyeetu kwiiguru yo obhweera bhweetu, okubha bhagumire mubhwiikirirya bhweetu.

<sup>3</sup> Naabhe Krisito woosi, ataakoriri amang'ana gano gakamuzomera ewe omweene. Nawe akakora kyeego Amakaamo Amahoreeru gakubhuga, “Amatuki gano bhakukutuka Taatabhugya, gakaanibhona enye.”\*

<sup>4</sup> Goosi gano gaakaamirwe ekare mu Makaamo Amahoreeru, gakakaamwa kwiiguru yo okutweegya etwe. Amakaamo gayo garatusakirya kukong'era munyaako yeetu na garatutoongera, okubha tubhe ne eriisigo.

<sup>5</sup> Taatabhugya niwe wuno akutuhaana okukong'era no okututoongera. Bhoono, nirasabha kubha, abhakore mwiikare kwa amiiseego gamwe, kwo okumweega Krisito Yeesu.

<sup>6</sup> Hayo niho emwe mwoosi mukunagya okumuguungya Taatabhugya, Taata wo

---

\* 15:3 Rora Zaburi 69:9.

Omukuru weetu Yeesu Krisito, kwe eriiseego rimwe na kwe eriiraka rimwe.

*Taatabhugya ariikirirya Abhayahudi na bhano bhatari Abhayahudi*

<sup>7</sup> Bhoono, mubhe muriikirirania emwe kwe emwe, kyeego Krisito yabhiikiriirye emwe, okubha abhaatu bhamuguungye Taatabhugya.

<sup>8</sup> Muhiite kubha, Krisito akaaza okusakirya Abhayahudi, okubha abheerekye obhuheene bhwa Taatabhugya. Kwe enzira ya Krisito, Taatabhugya akuunaanirye obhurage bhwoosi bhuno yarageenie bhazaazi bhaabhu.

<sup>9</sup> Kweeki, akaaza okubha abhaatu bhano bhatari Abhayahudi bhamukumye Taatabhugya kwe ebhigoongi bhyaaye. Ni kyeego Amakaamo Amahoreeru gakubhuga,

“Ambe, niramukumya gati wa abhaatu bhe ebhyaaro ebhiindi, nirakweembera ameembo go okumukumya awe.”<sup>†</sup>

<sup>10</sup> Kweeki, Amakaamo garabhuga, “Emwe abhaatu bhano bhatari Abhayahudi, muzomereerwe hamwe na abhaatu bha Taatabhugya!”<sup>‡</sup>

<sup>11</sup> Kweeki, Amakaamo garabhuga, “Emwe abhaatu bhano bhatari Abhayahudi, mumukumye Omukuru, Taatabhugya.

Emwe abhaatu bhe eziingaanda zyoosi mukyaaro,

mumukumye bhukong’u!”<sup>§</sup>

<sup>†</sup> 15:9 Rora Zaburi 18:49; 2 Samweeri 22:50.    <sup>‡</sup> 15:10 Rora Obhuhiiti bhwe Emigiro 32:43.    <sup>§</sup> 15:11 Rora Zaburi 117:1.

12 Naabhe omurooti Isaya neewe akabhuga,  
 “Omuutu owumwe okurwa murwiibhuro rwa  
 Yeese araza,

neewe arakaangata ebhyaaro bhyoosi.

Na abhaatu bhe ebhyaaro bhyoosi,

bharamwiisiga kubha, niwe akubhatuurya.”\*

13 Taatabhugya niwe wuno tukwiisigira kubha  
 arakora goosi gano akaturagania. Kweego,  
 nirabhasabhira, abhahe omureembe mwaaru no  
 obhuzomererwa bhwaaru hano  
 mukugeenderera okumwiikirirya. Hayo niho  
 mukubha ne eriisigo ikuru, kwo obhuturo bhwe  
 Ekoru Muhoreeru.

*Obhugirirye bhwa Pauro bhwo okukaama  
 enyaarubha yaaye*

14 Abhahiiri bhaane, enye omweene nino  
 obhuheene kubha emwe ni bhaatu abhazomu  
 bhukong’u, na mumenyiri bhuzomu kyeego  
 mukweenderwa kukora, kweeki muno  
 obhunagya bhwo okweegyana.

15 Naabhe ego, nibhakaamiiri amang’ana  
 agaandi munyaarubha yino kwo obhukaari,  
 okubha nibhahiitye amang’ana gayo. Nikoriri  
 ego, kutuukana no orubhaango runo  
 Taatabhugya aniheeri,

16 okubha nibhe omuhokya wa Krisito Yeesu  
 kubhaatu bhano bhatari Abhayahudi. Niheerwe  
 emirimo gyo okubharwaazira Amang’ana  
 Amazomu ga Taatabhugya kyo omuseengeri,  
 okubha bhabhe kye ekimweeso kino  
 kikumuzomera Taatabhugya no okweeribhwa  
 ne Ekoru Muhoreeru.

\* 15:12 Rora Isaya 11:10.

17 Bhoono, kutuukana no okugwaatana kweenye na Krisito Yeesu, niranagya okwiikumirya emirimo gyaane kwiiguru wa Taatabhugya.

18 Neenye nitakugaamba eriing'ana ryoryoosi eriindi, nawe garya ageene gano Krisito yakoriri kuhitira kweenye. Akakora abhaatu bhano bhatari Abhayahudi bhamwiigwe, kuhitira amang'ana gano niari nikugaamba ne emirimo gino niari nirakora.

19 Bhakarutwa okumwiigwa, kwo okubha bhakarora amanaga ga Krisito kwe ebhyeerekenio ne ebhiruguuro. Nikanagya okugakora kwa amanaga ge Ekoru wa Taatabhugya. Kweego, nikiiruguura hagiho hoosi nirarwaaza Amang'ana Amazomu iguru wa Krisito, kweemera mumugye gya Yerusaremu tee mumugye gwa Iruriko.

20 Mugayo goosi, ni miiseego gaane okuraarika Amang'ana Amazomu hagiho hohoosi hano abhaatu bhakyaari okurwaazirwa iguru wa Krisito. Nirakora ego, okubha nitakyoorera okutaanga bhuhya emirimo ahagiho hano omuutu owuundi amariri kukora.

21 Kyeego Amakaamo Amahoreeru gakubhuga, “Abhaatu bhano bhakyaari okurwaazirwa amang'ana gaaye, bharaaza kurora, na abhaatu bhano bhakyaari kwiigwa, nibho bharaagamenye.”†

*Pauro ariigoomba okugya mumugye gwa Rooma*

---

† 15:21 Rora Isaya 52:15.

<sup>22</sup> Emirimo giyo nigyo ekigirirye, nikatamwa maanga kaaru okuuzza kweemwe.

<sup>23</sup> Nawe bhoono, nimariri emirimo gyaane muziimbaara zino, na kumyaaka myaaru nibheeri na amiiseego makuru go okuuzza kweemwe,

<sup>24</sup> ndiisiga okukora ego. Niingaseegiri okubharora hano niraahite kweemwe okugya mukyaaro kya Hisipania no okwiikara hamwe neemwe kwiibhaga iguhi Rooma hayo. Ndasabha musakiryeku murugeendo rwaane ruyo.

<sup>25</sup> Nawe bhoono, niragya Yerusaremu kwiiguru yo okuhira obhusakirya kubhahoreeru bhe erya.‡

<sup>26</sup> Abhahoreeru bhano bhari Makedonia na Akaaya, bhakarora ni bhuzomu okuruusya omusororo, bhasakirye abhataka gati wa abhahoreeru bhano bhari Yerusaremu eyo.

<sup>27</sup> Bhayo abheene bhakaamura kukora ego. Nawe ni heene bharatunibhwa okubhasakirya, kwo okubha bhano bhatari Abhayahudi bhagwaateeni hamwe na Abhayahudi murubhaango rwo obhutuurya bhuno bhukuhitira ku Bhayahudi. Kweego, bhano bhatari Abhayahudi bhareenderwa bhagwaatane na Abhayahudi kwe ebhigiro bhyaabhu.

<sup>28</sup> Hano nikubha nimariri emirimo giyo gyo okubhaha omusororo guyo, nirageenderera no orugeendo rwaane rwo okugya Hisipania, na nirahitira kweemwe.

---

‡ 15:25 Rora 2 Abhakoriinto 8:19-20.

<sup>29</sup> Nimenyiri kubha, hano niraahike kweemwe no okwiikara hamwe neemwe, Krisito aratutweera ebhite kwo obhukuunaanio hano nikubha hayo.

<sup>30</sup> Abhahiiri bhaane, kwo obhuturo bhwo Omukuru weetu Yeesu Krisito, no okutuukana no obhuseegi bhuno Ekoru Muhoreeru atuheeri, nirabhiisasaama kwe ekoro yaane yoosi kubha, mukore omukya okugwaatana neenye kwo okunisabhira ku Taatabhugya.

<sup>31</sup> Munisabhire kubha, abhaatu bha mukyaaro kya Yudea bhano bhatakumwiigwa Yeesu Krisito, bhataaza bhakaanikorera obhubhi. § Kweeki musabhe okubha abhahoreeru bha Yerusaremu erya, bhiikirirye okusuung'aana omusororo guno niraabhahirire.

<sup>32</sup> Kweego, eraabhe Taatabhugya araaseege, niraaza kweemwe hayo kwo obhuzomererwa bhukong'u, okubha nimuunye hamwe neemwe.

<sup>33</sup> Taatabhugya wuno akubhaha omureembe, abhe hamwe neemwe. Gabhe ego.

## 16

### *Pauro aratumania obhukeerya kubhaatu bhaaru*

<sup>1</sup> Ndaseega okumumenyeekererya omusubhaati weetu Fibi. Ewe ni musakirya we ekanisa yino eri mumugye gwa Kenikirea.

<sup>2</sup> Ndasabha mumuginihye bhuzomu, kwe ekigirirye neewe ni mwiikirirya wo Omukuru Yeesu. Mumuginihye kyeego ekweenderwa gati wa abhahoreeru bha Taatabhugya. Kweeki,

---

§ 15:31 Rora Amahokya ga Abheega 21:27-36.

nirasabha kubha, mumusakirye na kyokyoosi kino akweenda, kwo okubha ewe asakiirye abhaatu bhaaru, naabhe enye.

<sup>3</sup> Mubhakeerye Prisika hamwe no omusubhe waaye Akiira. Bhayo ni bhahokya abharikyaane mumirimo gya Krisito Yeesu,

<sup>4</sup> ebho bhakiiruusya naabhe okubhurya obhwiikari bhwaabhu kwiiguru waane. Etari enye omweene wuno nikubhabhuurira bhazomirye, nawe na amakanisa goosi ga bhano bhatari Abhayahudi, bharabhabhuurira bhazomirye bhukong'u.

<sup>5</sup> Kweeki, mubhakeerye abhiikirirya bhano obhona bhakwiikumania munyuumba yaabhu. Mumukeerye no omusegwa waane Epaineto. Ewe niwe wo okutaanga okumwiikirirya Krisito mukyaaro kya Asia erya.

<sup>6</sup> Mubhakeerye Mariamu wuno yakoriri omukya bhukong'u okukora emirimo kwiiguru weenyu.

<sup>7</sup> Mubhakeerye Andironiko na Yunia. Bhayo ni Bhayahudi abharikyaane bhano bhaabhohirwe hamwe neenye mukibhoho. Bhakaanikaangata okumwiikirirya Krisito, kweeki bharasuukwa bhukong'u gati wa abheega.\*

<sup>8</sup> Mumukeerye omusegwa waane Ampuriato, kwo okugwaatana no Omukuru Yeesu Krisito.

<sup>9</sup> Mumukeerye Urubano, omuhokya omurikyeetu mumirimo gya Krisito, na naabhe omusegwa waane Sitakisi.

---

\* **16:7 Bharasuukwa bhukong'u gati wa abheega,** obhugazuro obhuundi bhuratura kubha, *bharasuukwa bhukong'u na abheega.*

<sup>10</sup> Mumukeerye Apere. Ewe yaari omukong'eru mubhusakya bhwaaru kwiiguru wa Krisito. Kweeki mubhakeerye abhaatu bha munyuumba ya Arisitoburo.

<sup>11</sup> Mumukeerye Herodioni, Omuyahudi omurikyaane. Mubhakeerye abhaatu bha munyuumba ya Narikiso bhano bhakumwiikirirya Omukuru Yeesu Krisito.

<sup>12</sup> Mubhakeerye Tirifaina na Tirifosa. Abhakari bhayo bhano omukya bhukong'u kukora emirimo gyo Omukuru Yeesu Krisito. Kweeki, mumukeerye omuseegwa waane Perisasi. Wuno woosi ni omukari wuno akoriri omukya bhukong'u kukora emirimo gyo Omukuru Yeesu Krisito.

<sup>13</sup> Mumukeerye Rufo, omusorwa wo Omukuru Yeesu Krisito, hamwe na nina waabhu, wuno abheeri maayi kweenye woosi.

<sup>14</sup> Mubhakeerye Asinikirito, Furegoni, Herime, Patiropa, Herima na abhiikirirya bhoosi bhano bhari hamwe nabho.

<sup>15</sup> Mubhuteero, mubhakeerye Firorogo na Yuria, Nerea no omusubhaati waaye, na Orimpa, hamwe na abhahoreeru bhoosi bhano bhari hamwe nabho.

<sup>16</sup> Mubhakeerye abhiikirirya bhoosi kwo obhuseegi bhwa Krisito. Abhaatu bha mumakanisa goosi, bharabhakeerya.

### *Pauro arabharekya abhiikirirya*

<sup>17</sup> Bhoono, abhahiiri bhaane, nirabhiisasaama kubha, mubhe meeso na abhaatu bhano bhakugirya obhutwaanikani gati wa abhiikirirya. Abhaatu bhayo bhareenda kusarya

obhwiikirirya bhwa abhaatu, no okwaanga ameegyo gano mukeegibhwa. Mwiiyaahure kure nabho!

<sup>18</sup> Abhaatu bhe etuubho yiyo bhatakumuhokeerya Krisito, Omukuru weetu, nawe kino bhakweenda ni kutuniirira eziinaamba zyaabhu ezyeene. Bharagaamba amang'ana amazomu go okuzomeerya, nawe bharang'eena abhiikirirya bhano bhatakwiisigira obhubhi bhwobhwoosi.

<sup>19</sup> Abhaatu bhoosi bhiigwiiri kyeego mukumwiigwa Omukuru Yeesu. Eriing'ana riyo riranizomeerya bhukong'u. Naabhe ego, ndeenda mubhe na amang'eeni bhukong'u kwo okukora amang'ana amazomu, na mutabha na amasoro gogoosi kwo okukora amabhi.

<sup>20</sup> Taatabhugya wuno akubhaha omureembe, aramutazira haasi Seetaani ibhaga iguhiigo, no okubhaha obhuhizi iguru waaye. Orubhaango rwo Omukuru weetu Yeesu Krisito, rubhe hamwe neemwe. [Gabhe ego.]

<sup>21</sup> Timoteo, omuhokya omurikyaane, arabhakeerya. Kweeki, Abhayahudi abharikyaane Rukio, Yasoni na Sosipatiro, bharabhakeerya.

<sup>22</sup> Enye Teritio, omukaami we enyaarubha yino ya Pauro, nirabhakeerya kyo omwiikirirya omurikyeenyu wo Omukuru Yeesu.

<sup>23</sup> Enye Pauro wuno nikwiikara wa Gaayo, neewe Gaayo, hamwe na abhiikirirya bhoosi bhe ekanisa ya hano bhakwiikumaniryaho. Erasito niwe omubhiiki we eziimbirya zyo omugye

guno,† hamwe no omwiikirirya omurikyeetu  
Kwarito, bharabhakeerya.

[  
24 Orubhaango rwo Omukuru weetu Yeesu  
Krisito, rubhe hamwe neemwe mwoosi. Gabhe  
ego.]

*Pauro aramukumya Taatabhugya*

25 Bhoono, tumuguungye Taatabhugya! Ewe  
niwe akunagya okubhakora mubhe muragumira  
mubhwiikirirya bhweenyu, kwo okurwaazwa  
Amang'ana Amazomu iguru wa Yeesu Krisito no  
kwo okutuukana no obhukuundukuro bhwe  
eheene bhwe embiso yino yaari ebhisirwe ekare.

26 Nawe bhoono, obhuheene bhuyo,  
bhutuurirwe kubhweero, kwe enzira ya  
Amakaamo Amahoreeru ga abharooti,  
amang'ana gayo garamenyekana kubhaatu bhe  
ebhyaaro bhyoosi. Taatabhugya wa kirakeego  
niwe arageenie amang'ana gayo garaarikwe  
kubhaatu bhoosi, okubha bhayo bhabhone  
okumwiikirirya no okumwiigwa Omukuru  
Yeesu.

27 Taatabhugya omweene ego niwe wa  
amang'eeni goosi. Niwe aguungibhwe kirakeego,  
kwe enzira ya Yeesu Krisito! Gabhe ego.

---

† 16:23 Omugye guyo hamwe nigwo omugye gwa Koriinto.

**Eriiragano Eriihya**  
**The New Testament in the Zanaki language of**  
**Tanzania: Eriiragano Eriihya**

copyright © Wycliffe Bible Translators, Inc.

Language: (Zanaki)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

---

PDF generated using Haiola and XeLaTeX on 11 Mar 2026 from source files dated 13 May 2025

59cdaa0a-a2d1-5bd9-b56f-be1ffc1ff2aa